



DE STUDENTE GUIDE

EDITIOUN 2025/26

EIS GUIDEN



De Studenteguide

Edition 2025/26

acel.lu/studenteguide



EIS GUIDË GINN

DIGITAL!

Eng nei Plattform wou's du d'Äntwerten op all deng Froen zum Studium, denger Studiestad etc. fënns!

START AB SEPTEMBER 2025





Laurent Schengen

Vizepresident
Representatioun



Pit Feltes

Comitésmember



Sarah Stockreiser

Comitésmember

Léif (zukünfteg) Student:innen,

No der Schoul fänkt fir vill jonk Leit eng nei a spannend Liewensetapp un. Egal ob s du däi Studium zu Lëtzebuerg méchs, an engem anere Land an der EU oder wäit iwwer d'EU-Grenzen eraus, d'Verännerunge sinn ëmmer grouss. Fir vill ass et déi éischte Kéier, wou ee ganz op sech selwer gestallt ass an déi éischte Kéier esou richtig mat deene bürokrateschen Erausfuerderunge vum selbstännege Liewen a Kontakt këntt.

Dës Erausfuerderunge kënnen sech gläich am Ufank weisen, heiandsdo och eréischt méi spët. E puer Problemer wäerten dech vläicht guer net betreffen – an dat hoffe mir natierlech och. Mee falls dach, da wëlle mir mat dësem Guide eng éischt Orientéierungshëllef bidden.

De Guide ass am éischten Deel no de verschiddene Länner strukturéiert, esou dass du déi wichtegst Informatiounen fir däin zukünfteg Studieland op ee Bléck hues. Am zweeten Deel fënnt een dann och méi allgemeng Tipps a Recommendatiounen, déi fir all Student:in nützlich kënnen sinn egal wou ee studéiert, vun der Wunnengssich bis zu Stagë sinn do vill hëllefträich Tipps dobäi.

E grouse Merci geet un all d'Institutiounen an un eis Cerclen, déi matgeholf hunn dëse Guide z'erstellen. E spezielle Merci gëllt och dem ACEL-Comité, dee sech mat vill Engagement fir dës siwent Editioun gesat huet.

Zum Schluss wënsche mir dir vill Freed a Succès am Studium. Och wann dëse Guide net all Fro oder Schwierigkeet ofdecke kann, stinn dir d'ACEL an d'Cercleswelt ëmmer zur Säit, falls s du mol Hëllef brauchst.

IMPRESSUM



Editeur	Association des Cercles d'Étudiants Luxembourgeois (ACEL) 2, avenue de l'Université L-4365 Esch-sur-Alzette Tél.: 20 60 84 84 E-mail: contact@acel.lu Internetsite: www.acel.lu RCS Luxembourg F969
Tirage	6000 Exemplairen
Koordinatioun	Laurent Schengen, Sarah Stockreiser, Pit Feltes
Realisatioun	Alexandre Luong
Fotoen	www.unsplash.com www.adobe.stock.com
Editioun	2025

INHALTSVERZEICHNES

- 6** WAT ASS D'ACEL?
- 10** STUDÉIEREN...
 - 11** ...ZU LËTZEBOURG
 - 15** ...AN DÄITSCHLAND
 - 20** ...A FRANKRÄICH
 - 24** ...AN DER BELSCH
 - 28** ...AN DER SCHWÄIZ
 - 34** ...AN ÉISTRÄICH
 - 37** ...A GROUSSBRITANNIEN
 - 41** ...AN HOLLAND
 - 44** ...AN DEN USA
- 48** WUNNENGSSICH
- 52** FINANZÉIERUNG
- 57** KRANKEVERSÉCHERUNG
- 63** STAGEN

WAT ASS D'ACEL?

D'Association des Cercles d'Étudiants Luxembourgeois (ACEL) ass en Daachverband, deen aus Lëtzebuenger Student:inne besteet, déi als Zil hunn, d'Schüler:innen an d'Student:innen aus dem Land iwwert déi verschidde Studiegäng ze informéieren, se reegelméisseg zesammenzebréngen a se duerch e permanente Kontakt mat deene verschiddene Ministèren ze representéieren.

D'ACEL ass 1984 gegrënnt ginn an huet sech säitdeem als Missioun gesat, dass d'Student:inne besser gehéiert solle ginn. D'Associatioun ass zanterhier net méi aus dem Lëtzebuenger Student:innemilieu ewechzededenken.

Haut vertritt d'ACEL iwwert 40 Cerclen, déi duerch d'ganz Welt verdeelt sinn. Et fënnt ee se an Däitschland, a Frankräich, an der Belsch, zu Lëtzebuerg, an Éisträich, an der Schwäiz, a Groussbritannien an Holland an a Portugal. Dës Cerclen empfänken d'Lëtzebuenger Student:inne während hirer Studienzäit an hirer Studiestad a ginn de Student:innen d'Méiglechkeet, u flotten Eventer deelzehuelen.

Dernieft ginn et nach déi fachspezifesch Cerclen. Dozou gehéieren d'Medezins-, d'Ekonomies-, d'Droits-, d'Psychologies-, d'Archivistik/Bibliothekär-, d'Ingenieurs-, d'Historiks-, d'Sport-, d'Politikwëssenschafts- an d'Pedagogikstudent:innen.

Dës grouss Unzuel u Cerclë mécht d'ACEL zum gréissten a wichtigste Student:innevertieder zu Lëtzebuerg.

WAT ASS DER ACEL HIR AUFGAB?

MIR REGRUPPÉIEREN...

MIR INFORMÉIEREN...

MIR REPRESENTÉIEREN...

MIR REGRUPPÉIEREN

Ee vun den ACEL hiren dräi Haaptziler ass et, d'Student:innen aus deene verschidde Stied zesammenzebréngen. Dofir organiséiert d'ACEL alljoers verschidden Evenementer. Ee vun deene gréissten Eventer ass **De Studentebal**, deen alljoers am Juli stattfënnt. Mat sengem eenzegaartege Konzept bréngt en an engem Owend déi verschidde Kulturen an Traditiounen aus deene verschiddene Studiested zesummen.

E weidert Event ass den **Tournoi de Noël**, deen alljoers am Dezember stattfënnt an deene verschiddene Student:innecleren d'Méiglechkeet gëtt, während zwee Deeg am Basket, am Volleyball an am Fussball géinteneen unzetrieden.

Och d'**Réunion Européenne des Étudiants Luxembourgeois (REEL)**, déi alljoers ronn 150 Lëtzebuurger Student:innen an enger europäescher Studiested zesummebréngt, ass e wichtegt Evenement, dat d'Student:inne vereent.



MIR INFORMÉIEREN

Der ACEL ass et wichtig, dass d'Schüler:innen an d'Student:innen iwwert hir Méiglechkeeten nom Lycée, während dem Studium esou wéi och no de Studien informéiert ginn. Fir dëst Zil ze erreechen, bréngt d'ACEL alljoers verschidde Publikatiounen eraus.

Am **Guide du Futur Étudiant** fannen d'Schüler:innen all déi néideg Informatiounen iwwert déi verschidde Studiested, wéi och iwwert déi verschidde Formatiounen, déi an deenen eenzele Länner ugebuede ginn.

De Studenteguide ass vollgepaakt mat Informatiounen zu 36 Studiested, den Unien, dem Studium an nach viles méi, fir de Student:innen de Start an d'Studieliewen ze vereinfachen.

De **Guide du Futur Diplômé** gëtt de Student:innen eng ganz Rei Informatiounen mat op de Wee, déi hinnen de Start an d'Beruffswelt erlichtere sollen. Niewent dësen dräi Publikatiounen geet d'ACEL och reegelméisseg an déi verschidde Lycéeën uechtert d'Land, fir d'Schüler:innen iwwert d'Studien ze informéieren.

Dës dräi Publikatiounen wäerten ab September 2025 digitaliséiert ginn an op enger interaktiver Plattform ënnert dem Numm **Studenteguide** zesummegefuert ginn. (studenteguide.lu)

Fir de Schüler:inne bei hirer Entscheidung iwwert zukünfteg Studien ze hëllef, organiséiert d'ACEL alljoers de **Student fir 1 Dag**. Hei hunn d'Schüler:innen d'Méiglechkeet, mat engem Bus an hir zukünfteg Studiested ze fueren a sech op der Plaz vun de Lët-

zebuerger Student:innen d' Stad, d' Uni an aner Raimlechkeete weisen ze loos- sen. Säit dräi Joer hunn d' Schüler:innen och d' Méiglechkeet, an dräi zou- sätzlech Stied mam Fliger ze reesen. D' Schüler:inne kommen esou a Kon- takt mat de Lëtzebuerger Student:in- nen a kënnen sech all hir Froen iwwert d' Studieliewe beäntwere loos- sen.



D' ACEL an hir Membercerclé sinn och alljoers op der **Foire de l'Étudiant** ver- trueden, déi am Oktober stattfënnt, fir den zukünftege Student:innen esou vill wéi méiglech nätzlech Informatiounen mat op de Wee ze ginn an hinnen all hir Froen, wat d' Studéieren ugeet, ze be- äntwerten.

MIR REPRESENTÉIEREN

Nieft dem Regruppement an der Informatioun vertritt d' ACEL d' Student:inne virun den Autoritéiten a verdeept hir Rechter.

An dësem Kontext steet d' ACEL a reegelméissegem Dialog mat de verantwortleche Ministèren, ënner anerem dem Ministère fir Héichschoulbildung a Fuerschung, wéi och dem Aarbechtsministère.

D' ACEL ass awer net nëmmen national aktiv, mee hëlleft och de Student:innen am Ausland bei Problemer mat den Autoritéiten.

D' ACEL ass ideologesch a parteipolitesch neutral, dat heescht, dass si keng bestëmmt parteipolitesch Meenung vertritt. Dat ass extrem wichteg, well d' ACEL dem Usproch, all d' Student:innen ze representéieren, wëll gerecht ginn.

» KONTAKT ACEL

www.ace.lu // contact@ace.lu // [f ACEL-De Studentevertrieder](https://www.facebook.com/ACEL-De-Studentevertrieder)

[in ACEL-De Studentevertrieder](https://www.linkedin.com/company/ACEL-De-Studentevertrieder) // [@acelluxembourg](https://www.instagram.com/@acelluxembourg) // [d acelluxembourg](https://www.tiktok.com/@acelluxembourg)

STUDÉIEREN...



Ob s du Student:in zu Lëtzebuerg oder am Ausland bass, hei sinn nätzlech Informatiounen fir dech!

ERASMUS

All Student:in huet am Kader vu sengem Studium d'Recht, 6 bis 12 Méint op enger Partner-Uni ze studéieren. Dëst nennt een en Erasmus.

Den Erasmus verlaangt eng gewëssen Organisatioun. D'Demarchen, déi s du maache muss, fir fortzegoen, si folgend:

1. Mat Zäiten däin Dossier virbereeden (1 Joer am virraus) an erarechen.
2. D'Lëscht vun den Unien duerchkucken a kontrolléieren, wéi vill Plaze se ubidden.
3. Kucken, wéi ee Semester s du fort kanns a sécherstellen, dass dëst mam Uniskalenner iwwerteneestëmmt.
4. Dech iwver d'Sproochkenntnisser, déi verlaangt ginn, informéieren (deemno wéi ass hei e Sproochentest néideg).
5. Eng Krankeversécherung hunn (normalerweis geet deng Carte européenne d'assurance maladie duer).
6. Dir iwverleeën, wéi s du dat Ganzt finanzéiers (op der Uni.lu huet een deelweis eng Bourse zegutt).
7. Kucken, datt Coursen ugebuede ginn, déi s de beleë muss, an dass du genuuch ECTS-Punkten dofir kris.

Wann s du an d'Ausland studéiere gees, hues du, während deem Zäitpunkt wou s du am Ausland studéiers, d'Recht op d'Bourse de Mobilité vum Service Aides financières vum Ministère fir Héichschoul a Fuerschung, wann s du do och e Mietvertag hues.

Wann s du een Austausch an der Schwäiz maache wëlls, da muss du net iwver den Erasmus-Programm, mee iwver de Swiss-European Mobility Program fueren. D'Konditiounen sinn awer déi selwecht wéi fir den Erasmus.




Folgend Informatiounen bezéie sech op d'Uni.lu (se kënnen an deenen anere Länner variéieren)

Op der Uni.lu ass een Auslandssemester bis zum Ofschluss vum Bachelor obligatoresch. D'Bachelorstudent:inne kënnen meeschtens am 3., 4., oder 5. Semester en Erasmus maachen. Dofir muss een awer mindestens 15, respektiv 10 ECTS-Punkten am 1. Semester gepackt hunn. D'Masterstudent:inne kënnen nëmmen am 3. Semester an den Erasmus goen. Heifir muss ee säin Erasmus-Projet erarechen, deen dann evaluéiert gëtt.

Fir d'Student:inne fënnt eng Informatiounsveranstaltung am Ufank vum Semester statt (2. Donneschden am November). Am März mécht een dann dräi Choixen, fir unzeginn, wou een am léifsten hi wéilt. Dono kritt een

e Formular per Mail geschéckt, deen een ausfëlle muss. Déi responsabel Persoun vum Studiendepartement verdeelt dann déi fräi Plazen op Basis vun de Punkten, déi een huet (Enn März bis Abrëll).

Wann den Dossier da vun der Uni, op där ee studéiert, accordéiert gouf, muss ee sech op där Uni umellen, wou een hi wéll. Et muss ee säin Dossier selwer un d'Uni schécken. E Learning agreement oder online learning agreement gëtt ausgefëllt (30 ECTS-Punkte minimum). Dëse muss vum Responsablen aus dem Studiendepartement an der Host-Universität accordéiert ginn. Et kann een deen éischte Mount vum Erasmus dëse Learning agreement änneren, wann et néideg ass. Eng Ännerung muss och erëm vun deenen zwou Unien accordéiert ginn. Wann d'Sprooch vun de Coursen eng aaner ass, wéi di eege Mammesprooch, muss een en enger Language Evaluation deelhuele. Erreicht een hei e Sproochniveau ënner B2, da muss ee virun a während sengem Erasmus u Sproochkursen deelhuele.



GRATIS ÖFFENTLECHEN TRANSPORT

Säit dem 1. Mäerz 2020 ass den öffentliche Transport fir jiddereen zu Lëtzebuerg gratis.

WUNNENG

D'Uni këmmert sech net ëm d'Wunnengssich. Du muss dech also selwer ëm e Logement an deem Land, wou s du däin Erasmus méchs, këmmere. Oft hunn déi Unien awer selwer Wunnengen, déi se Erasmusstudent:innen zur Verfügung stellen. Well och hei d'Unzuel limitéiert

ass, muss du fréi genuch u sinn, fir esou eng Plaz ze kréien. Heifir mells du dech am beschten direkt bei der Uni selwer.

Méi Informatiounen zum Erasmus+ Programm vun der Uni.lu fënns du hei:

www.uni.lu/en/mobility/outgoing-student-mobility/erasmus/



TOUTES LES ROUTES MÈNENT À L'ARTISANAT



**CHAMBRE
DES MÉTIERS**
LUXEMBOURG

**De Partner
vum Handwierk**

Déi meescht Lëtzebuenger Student:inne studéieren an eisem Nopeschland Däitschland. Egal ob s du no un der Lëtzebuenger Grenz oder méi wäit fort wëlls studéiere goen, dës Informatiounen kënnen während dengem Studium an Däitschland nëtzlech sinn!

FEINSTAUBPLAKETTE (ËMWELTPLAQUETTE)

Fir d'Loftqualitéit ze verbesseren, ginn ëmmer méi Stied op de Wee vun enger Ëmweltplaquette. An Däitschland ass et déi sougenannt „Feinstaubplakette“. Dës kanns du bei all TÜV kafen (5-20€ je no TÜV) oder beim ACL bestellen (15 € resp. 7,5 € fir Memberen). Beim TÜV kritt ee se direkt op der Plaz ausgestellt. Beim ACL kann et bis zu zéng Schaffdeeg daueren, bis ee se huet.

Jee no der Schuedstoffklass vum Auto kritt een eng gréng, eng giel oder eng rout Plaquette ausgestellt, mat där een da mat sengem Auto an déi jeeweileg Stad kann erafuere. Wat fir eng Plaquette ee brauch a wat fir eng Stied ënner dës Ëmweltregelung falen, fënns du um Internetsite:

www.umwelt-plakette.de/de/



Du kanns dech och beim ACL iwwer déi verschidde Plaquetten informéieren an dës och direkt do bestellen:



ACL Bertrange
54, route de Longwy
L-8080 Bertrange
Tel.: +352 45 00 45-1
www.acl.lu

ACL Ingeldorf
34, route d'Ettelbruck
L-9160 Ingeldorf
Tel.: +352 45 00 45-2
www.acl.lu

KFZ

Ëmmer erëm gi Student:innen, déi en Auto mat engem lëtzebuergeschen Nummerschëld hunn, an Däitschland ugehale a kréie virgeheit, Steieren ze hannerzéien. Dat ass allerdéngs net de Fall, vu dass si Steieren zu Lëtzebuerg bezuelen. Des Weidere si Student:innen, déi just an Däitschland sinn, fir ze studéieren, also do op enger Uni oder Héichschoul ageschriwwe sinn, vun der KFZ-Steier befreit a mussen där keng do bezuelen.

Falls du e Bréif vun der Police oder dem Hauptzollamt kriss, mam Virwurf, dass du Steieren hannerzitts, kanns du folgend Schrëtt ënnerhuelen:

1. Schrëtt:

Op de Bréif vun der Police an/oder dem „Hauptzollamt“ äntweren. Op eisem Internetsite fënns du d'Virlag fir de Bréif, deen s du just nach mat dengem Donnéeën ausfülle muss:

acel.lu/2023/03/10/kfz-steiergesetz-2/



2. Schrëtt:

Un dese Bréif muss du dann nach folgend Dokumenter unhänken:

- E Certificat de résidence vu Lëtzebuerg
- Eng Kopie vun der groer Kaart
- Eng Kopie vun der Assurance
- Eng Kopie vun der Vignette fiscale
- Deng Umeldungsbescheinigung vun der Uni

3. Schrëtt:

Alles zesummen (wa méiglech perséinlech) bei der Police, respektiv beim „Hauptzollamt“ ofginn.

Wann s du weider Froen hues oder et zu Problemer sollt kommen, kanns du dech per E-Mail iwwer d'Adress contact@acel.lu bei eis mellen.



RUNDFUNKBEITRAG

An Däitschland gëtt et de sougenannte „Rundfunkbeitrag“. Dës Käschte setze sech souwuel aus Radios- wéi och Televisiounsfräisen zesummen. Et muss een deen och bezuele, wann ee keng Televisioun an/oder och kee Radio doheem huet. D'Käschte leien aktuell bei 18.36 Euro pro Mount, mee kënnen zu all Moment vun der däitscher Regierung no ënnen oder uewe geännert ginn. Du kriss, soubals du dech an denger Studiestad ugemellt hues, e Bréif wou steet weis du virgoe muss fir de Rundfunkbeitrag ze bezuelen, du muss also keng extra Schrëtt ënnerhuelen.

Am Moment ass eng Befreiung just fir déi Studenten:innen méiglech déi eng Bourse Sociale kréien. Falls dat bei dir de Fall ass, kanns du folgend Schrëtt ënnerhuelen:

1. Als éischt brauchst du e „Nachweis zum Antrag auf Befreiung von der Rundfunkbeitragspflicht für Studierende aus dem Großherzogtum Luxemburg“.

Den Héichschoulministère leet dëst Dokument direkt bei de gielen Ziedel, deen deng Bourse confirméiert, dobäi. Wann dat net de Fall ass, kanns du en Ziedel per E-Mail iwwe d'Adress aidefi@mesr.etat.lu ufroen. An der E-Mail muss Folgendes stoen: däin Numm, deng Reference interne oder deng Matricule a fir wéi ee Joer de Certificat soll sinn.

2. Op de Site vum Rundfunkbeitrag goen :

www.rundfunkbeitrag.de/index_ger.html




3. Do op „Kontaktformular“ an dann op „eine Frage zu meinem Beitragskonto stellen“ klicken. (net op „Befreiung oder Ermäßigung beantragen“ klicken)
4. Deng perséinlech Donnéeën ausfüllen an d'Bäitragnummer net vergiessen.
5. Am Feld „Ihre Nachricht“ solls du dann uginn, dass et sech bäi denger Ufro em een „Antrag auf Befreiung aufgrund eines besonderen Härtefalls“ handelt a kuerz erklären, dass du zu Lëtzebuerg eng Sozial Bourse kriss an déi néideg Dokumenter fir d'Befreiung heimat zoukomme léiss.
6. Am Feld „Datei anhängen“ de gescannte Formulaire vum Héichschoulministère eroplueden an d'Ufro ofschécken.

VERFLICHTENDEN HAAPTWUNNSËTZ

Laut dem däitsche Gesetz bass du als Student:in verflicht däin „Erstwohnsitz“ an denger Studentestad unzemellen, wann s du do eng Wunneng hues. Du muss awer drun denken, dass du dech net zu Lëtzebuerg ofmellen dierfs, well s du soss däin Urecht op d’Krankeversécherung verléiers. Du hues also ab deem Moment zwee Hauptwunnsëtzer, wat gesetzlech kee Problem ass. Eventuell kriss du, nodeems du dech ugemellt hues, Post vum Beitragsservice fir de Rundfunkbeitrag. Vun där Steuer kanns du dech awer befreie loossen, wann s du d’Sozialbourse kriss (weider Informatiounen dozou fënns du ënner dem Punkt „Rundfunkbeitrag“).

WARMMIETE/KALTMIETE

Ween an Däitschland eng Wunneng lount, gëtt gezwongenermoosse mat de Begrëffer „Kaltmiete“ a „Warmmiete“ konfrontéiert.



Kaltmiete: Dëse Montant setzt sech nëmmen aus deene Käschten, déi ee fir d’Wunneng un de:d’ Proprietär:in bezeue muss, zesummen an hänt souwuel vun der Gréisst vun der Wunneng, ewéi vum Quadratmeterpräis of.

Warmmiete: Dëse Montant setzt sech aus der „Kaltmiete“ an den Niewekäschten zesummen. Zu den Niewekäschten zielen d’Waasser, d’Heizung, Versécherungen, Fraise fir d’Offallentsuergung ewéi och méiglech Käschten, déi fir d’Botzpersonal ufalen, dat déi gemeinschaftlech Zonen am Appartementshaus botzt (Trapenhaus, Lift, etc). Oft ass et esou, dass du dech selwer ëm de Stroum, den Internet an den Telefon muss këmmen. Dës Käschte sinn also net an der „Warmmiete“ mat abegraff. Vu dass dëst also vu Fall zu Fall anescht ass, rode mir dir, éier s du de Kontrakt ënnerschreifs, beim:bei der Proprietär:in nozefroen, wat an der „Warmmiete“ mat abegraff ass.

BEFREIUNG VUN DER KRANKEVERSÉCHERUNG

Oft froen d’Unien eng Umeldung bei enger däitscher Krankekeess. Dëst brauchts du awer als Lëtzebuenger Student:in net ze maachen, well s du eng europäesch Krankekeesskaart („Carte européenne d’assurance maladie“) besët an dofir europawäit verséichert bass. Du muss dir just vun enger däitscher Krankeversécherung bescheinege loossen, dass du zu Lëtzebuerg verséichert bass. Heifir gees du mat denger Krankekeesskaart einfach an iergendeng Agence vun enger däitscher Krankekeess (zum Beispill d’AOK) a frees no engem

Ziedel, dee bestäetgt, dass du befreit bass. Bei de meeschten Unie si sou Filialen an der Géigend, mee du kanns awer och kuerz iwuer d'Grenz fueren (z. B. op Tréier) falls du grad nach zu Lëtzebuerg bass. Dësen Ziedel kanns du da bei der Uni areechen.

Wann s du engem Student:innejob nogees, kann et sinn, dass däin Employeur dech freet, fir eng däitsch Krankeversécherung nozeweisen. Allerdéngs ass et esou, dass du als Lëtzebuenger Student:in keng däitsch Krankeversécherung brauchst, wann s du manner ewéi 556 Euro de Mount mat dengem „Minijob“ verdéngs. Wann s du méi verdéngs, muss du awer eng Krankeversécherung an Däitschland hunn, fir agestallt ze ginn.

DÄITSCHÉ BANKKONT

Bei verschiddenen Telefons- an Internetubidder kann ee just mat engem däitsche Kont seng Rechnunge bezuelen. Oft kann een och just mat engem däitsche Kont säi Loyer a seng aner Chargë bezuelen. An deene meeschte Fäll gëtt de Montant souguer automatesch vum Kont ofgebucht.

Hei rode mir dir einfach, bei iergendenger däitscher Bank ee Kont opzemaachen. Dofir muss du deng Umeldungsbescheinegung mat op d'Bank huelen. Wichteg ass just, dass ëmmer genuch Geld um Kont ass, fir dass d'Zomme vun denge Rechnungen och all Mount kënnen ofgebucht ginn.





Obs du niewent dem Eiffeltuerm oder beim Europaparlament studéiers, och a Frankräich ginn et Besonneschkeeten, déis du an dengem Alldag als Student:in solls kennen. Lies dofir dës Informatiounen duerch!

VIGNETTE CRIT'AIR (ËMWELTPLAQUETTE)

Fir d'Loftqualitéit ze verbesseren, ginn ëmmer méi Stied op de Wee vun enger Ëmweltplaquette. A Frankräich heescht d'Ëmweltplaquette CRIT'Air. Se ass a bestëmmten Zone vu Frankräich obligatoresch. An deenen Zone kann de Verkéier zu bestëmmten Dageszäiten ageschränkt ginn. Du kanns d'Vignette online bestellen. D'Ausstellen dauert ongeféier 3 Wochen, de Präis ass 3,81 Euro. All weider Informatiounen fënns du ënnert www.certificat-air.gouv.fr, wou s du och deng CRIT'Air-Vignette bestelle kanns.

Du kanns dech och beim ACL iwwer déi verschidde Plaquetten informéieren:



ACL Bertrange
54, route de Longwy
L-8080 Bertrange
Tel.: +352 45 00 45-1
www.acl.lu

ACL Ingeldorf
34, route d'Ettelbruck
L-9160 Ingeldorf
Tel.: +352 45 00 45-2
www.acl.lu

PÉAGE

A Frankräich muss du bezuelen, fir op der Autobunn kënnen ze fueren. Dëst méss du am sougenannte Péage. Mat dësem Geld ginn d'Stroossen neigemaach an an der Rei gehalten.

Wann s du duerch e Péage fiers, kanns du dëse mat enger Visaskaart bezuelen, wat relativ séier geet oder mat borem Geld, wat e bësse méi laang dauert.

Wanns du dech beim Péage net onbedéngt wëlls an d'Rei stellen, kanns du dir och en Télépéage-Badge ufroen. Mat deem kanns du duerch déi Barrière fueren, déi extra fir den Télépéage reservéiert sinn. Je no Ubidder ginn et verschidde speziell Offere fir Jonker/Student:innen. Beim Ubidder „Bip&Go“ gëtt et eng Offer fir Student:innen ënnert 26 Joer, déi hire Führerschäin net méi laang ewéi 1 Joer hunn. Hei ass de Badge dat éischt Joer gratis, d.h. dass du d'Frais-de-gestion (16€ d'Joer) an d'Mise en service (10 €) net bezuele muss. Du kriss dann all Mount eng elektronesch Rechnung zougeschéckt, wou de Präis vun de Faarten duerch de Péage drop steet. Dëse Bip&Go kanns du och ganz einfach beim ACL kafen (Kontaktinformatiounen fënns du ënnert dem Punkt "Vignette Crit'air")

Méi Informatiounen zum Péage kriss du beim ACL oder op folgendem Site:

www.bipandgo.com/abonnement-telepeage-particuliers/jeune/



ËFFENTLECHEN TRANSPORT (TGV)

Fir net ëmmer musse mam eegenen Auto an d'Studiestad ze fueren, kanns du och den TGV huelen. Mëttlerweil fiert den TGV vu Lëtzebuerg aus op Metz, Nanzeg, Stroossbuerg, Lyon, Paräis, Montpellier, Lille, Rennes a Bordeaux.


Billjeeë kanns du ganz einfach online op www.sncf.com kafen. Mir roden dir allerdéngs un, däi Billjee laang genuch am Viraus ze kafen, well do d'Präisser fir den TGV nach méi bëlleg sinn.

Du kanns dir och bis 27 Joer eng „Carte jeune“ zouleeën, mat däers du vu Reduktiounen op den TGV-Billjeeë profitéiere kanns. Dës kascht 49 € pro Joer an du muss se och ëmmer bei denger Rees virweise kënnen.

Weider Informatiounen zur Carte jeune fënns du ënnert:

www.oui.sncf/train/carte-abonnement-train





CONTRIBUTION DE VIE ÉTUDIANTE ET DE CAMPUS (CVEC)

CVEC steet fir „Contribution de vie étudiante et de campus“ an ass e Betrag vun 103 € fir d'akademescht Joer 2024/2025, deen d'Student:innen, déi eng Formation initiale am Enseignement supérieur a Frankräich maachen, all Joer mussen bezuelen. Dësen Betrag muss virun der Aschreiwung bezuelt ginn.

Dësen Betrag kritt een net vum Service Aide financières vum Ministère fir Héichschoul a Fuerschung rembourséiert.

Méi Informatiounen fënns du um Site ënnert:

cvec.etudiant.gouv.fr



FINANZIELL HËLLEF VUN DER CAF

A Frankräich huet all Student:in d'Recht op eng staatlech finanziell Hëllef vun der CAF (Caisse d'allocations familiales). Dësen Montant läit ongeféier tëschent 80 an 200 € de Mount. D'Hëllef vun der CAF kanns du ganz einfach iwwer den entspreechenden Internetsite ufroen (www.caf.fr). Op dësem Site fënns du och Informatiounen zu deenen Dokumenter, déi s du brauchst, fir d'Hëllef unzefroen. Säit enger Reform ass dësen Montant vum Loyer vun der Wunneng ofhängeg.

FRANSÉISCHE BANKKONTO

Bei verschiddenen Televisiouns- an Internetubidden kann ee just mat engem franséische Konto seng Rechnungen bezuelen. Oft kanns du och just mat dem franséische Konto däi Loyer an deng aner Chargé bezuelen. An deene meeschte Fäll gëtt de Montant souguer automatesch vum Konto ofgebucht.

Hei rode mir dir einfach, bei iergendenger franséischer Bank e Konto opzemaachen. Dofir muss du däi "Contrat de bail" mat op d'Bank huelen. Wichtig ass just, dass ëmmer genuch Geld um Konto ass, fir dass d'Zomme vun den Rechnungen och all Mount kënnen ofgebucht ginn.

CMCM

ÄR GESONDHEETSMUTUELLE
ZANTER 1956



mcskito.lu

Mat der CMCM hues du kee Stress wéinst Doktesch-, Zändoktesch- oder Klinikäschte während denger Studienzäit am Ausland. Medikaliséierten Transport a Rapatriement sinn och automatesch mat dran, illimitéiert an op der ganzer Welt.

Vergieess deng CMCM Kaart also net! Méi Detailler op www.cmcm.lu

MIR SINN DO. FIR JIDDEREEN.

[f cmcm_luxembourg](https://www.facebook.com/cmcm_luxembourg) [@cmcm_lu](https://www.instagram.com/@cmcm_lu) [▶ CMCM Luxembourg](https://www.youtube.com/channel/UCMCM) [x cmcm_lu](https://www.linkedin.com/company/cmcm_lu) [☰ CMCM-App](https://www.getapp.com/cmcm)

Scan me!



Och an der Belsch ginn et eng Rei Saachen, déi s du als Student:in wësse muss. Mir hunn dir déi wichtegst Informatiounen zesummegefaasst, fir dir däi Liewen an der Belsch ze vereinfachen.

ZONE DE BASSES ÉMISSIONS (ËMWELTPLAQUETTE)

Fir d'Loftqualitéit ze verbessern, ginn ëmmer méi Stied op de Wee vun enger Ëmweltplaquette. Dës huet als Zil, déi ëmweltfrëndlechste Autoen ze favoriséieren, a wann ee keng huet, kann et séier deier ginn.

An der Belsch ware bis elo just Antwerpen a Bréissel concernéiert. Säit 2020 ass awer och zu Gent eng Ëmweltzon (LEZ) ageriicht ginn, an ab 2026 sollen der nokommen, zemoos an der Wallonie. All Autofuerer:in, deen:déi an déi Zon erafuere wëll, muss sech registréiere loossen. All weider Informatiounen zu der sougenannter Low Emission Zone (LEZ) fënns du hei:

www.acl.lu/fr/voyages-organises/preparer-un-depart/belgique-zones-environnementales/



Des Weidere gëllt ab dem 1. Juli 2022 en Diesilverbuet fir alleguerten d'Autoen, déi eng Euronorm 4 (oder méi al) hunn. Dëst gëllt op deem ganzen Territoire vun der „Région Bruxelles-Capitale“. D'Geldstrof, wann een dës Norm net respektéiert, ka bei bis zu 350 € leien.

Beim ACL kanns du dech och iwwer déi verschidde Plaquetten informéieren:



ACL Bertrange
54, route de Longwy
L-8080 Bertrange
Tel.: +352 45 00 45-1
www.acl.lu

ACL Ingeldorf
34, route d'Ettelbruck
L-9160 Ingeldorf
Tel.: +352 45 00 45-2
www.acl.lu

SEUIL DE RÉUSSITE

Säit dem akademesche Joer 2022-2023 gëtt et an der Regioun Wallonie-Bruxelles eng Reform, déi "Décret Paysage" genannt gëtt. Méi Informatiounen zu dëser Reform fënns du ënnert folgendem Link:

www.mesetudes.be/decret-paysage/



Mir hunn dir awer déi wichtegst Informatiounen hei eraus geschriwwen:

De Bachelor Studium besteet am ganzen aus 180 ECTS-Punkten (och nach Credits genannt). All eenzelt Joer besteet dann aus 60 ECTS-Punkten.

Um Enn vum 1. Joer si folgend Situatiounen méiglech:

- Du hues 60 ECTS Punkte validéiert: Du kënns normal an dat zweet Joer mat all de Coursë vum 2. Joer.



- Du hues tëschent 55-59 ECTS Punkte validéiert: Coursë vum nächste Joer kënnen geholl ginn, awer net méi wéi 65 ECTS, an du muss eng Ufro stellen, fir offiziell an dat 2. Joer gelooss ze ginn.
- Du hues tëschent 45-54 ECTS Punkte validéiert: Coursë vum nächste Joer kënnen geholl ginn, awer net méi wéi 60 ECTS (1. an 2. Joer zesummen), an du muss eng Demande erareeche fir deng gewielte Fächer ze validéieren.
- Du hues tëschent 30-44 ECTS Punkte validéiert: Coursë vum nächste Joer kënnen geholl ginn, awer net méi wéi 60 ECTS, an du muss eng Demande erareeche an en Jury muss denge gewielte Fächer zoustëmmen.
- Du hues tëschent 1-29 ECTS Punkte validéiert: Et ass net méiglech, Coursë vum nächste Joer ze huelen, an eng Remediatiounsaktivitéit ass obligatoresch. Du kanns deementspreechend deng 31-59 ECTS Punkte vun deem Joer nohuelen.

Dann ass et och wichtig ze wëssen, dat ee fir all Examen eng Nott vu mindestens 10/20 brauch. Eng Gesamt Moyenne vun all de Fächer déi iwwert 10/20 ass geet an der Belsch leider net duer. Dobäi ginn et awer puer ganz spezifesch Ausnamen, wann s du 2 oder méi Fächer an enger Unité d'Enseignement (UE) hues, kanns du déi eventuell matenee kompenséieren. Dëst hänkt awer ëmmer vun der Unité d'Enseignement of, dëst gëtt awer ëmmer ganz kloer am Ufank vum Semester kommunizéiert.

Eng zweet grouss Ännerung vum neien Décret Paysage sinn d'„Règles de finançabilité“. Deng „Finançabilité“ ass deng Kapazität weiderhivun denger Uni finanziert ze ginn. Dës gétt gerechent andeems ee kuckt wéi vill ECTS Punkte s du dëst Joer, esou wéi och déi Jore virdu gepackt hues. Dat ass awer meeschtens eng personaliséiert Rechnung. Dat eenzegt wat fir dech wichteg ass, ass dat een 2 Joer Zäit huet fir déi 60 ECTS Punkte vum 1. Bachelor Joer ze validéiere fir weider finanziéierbar ze sinn.

Mat 165/180 gepackten ECTS-Punkten aus dem Bachelor ass et méiglech, e Master Studium unzufänken. Et muss een awer dofir am selwechte Joer, wéi een de Master ufänkt, déi 15 ECTS-

Punkten nohuelen an dat geet och nëmmen, wann een de Master op der selwechter Uni mécht. Ausserdeem dierf däi Joer net méi wéi 60 ECTS hunn, Bachelor- a Master-Coursen zesummen. Falls een awer fir de Master d'Uni wiessele wëll, muss een all Cours mat op d'mannst 10/20 gepackt hunn, dat heescht, et muss een déi 180 ECTS-Punkte gepackt hunn.

Weider Informatiounen fënns de och op:


www.enseignement.be/index.php?page=23812





Déi ganz Eldo-Welt och an der Eldo-App!



 Radio

 Events

 News



Events



Ticket Bourse



Giveaways



Eldo 4 Real



Pictures Rep

 Follow us on Social Media



D'Schwäiz ass fir vill Lëtzebuerger:innen e beléift Studieland. Och hei hu mir dir déi wichtegst Informatiounen zesummegeacht, mat deenen s du méi einfach duerch däin Alldag kënnst.

AUTOSVIGNETTE

Fir an der Schwäiz kënnen op der Autobunn oder den Nationalstroossen ze fueren, brauch een eng Vignette. Dës Vignette kascht 40 Schwäizer Frang (CHF) (38,90 Euro), an et kritt ee se op der Grenz oder beim ACL ze kafen. Se ass fir dat ganz lafend Joer a bis den 31. Januar vum nächste Joer gültig.

Méi Informatiounen zur Vignette fënns du ënner:

www.ch.ch/de/autobahnvignette



Du kanns dech och beim ACL iwwe d'Schwäizer Vignette informéieren an dës och direkt do kafen:



ACL Bertrange
54, route de Longwy
L-8080 Bertrange
Tel.: +352 45 00 45-1
www.acl.lu

ACL Ingeldorf
34, route d'Ettelbruck
L-9160 Ingeldorf
Tel.: +352 45 00 45-2
www.acl.lu

ZOLL

Wann ee mat sengem Auto an d'Schwäiz wëll eran- oder erausfueren, muss ee sech beim Transport vu Liewensmëttelen, Déieren a Planzen u verschidde Virschrëften halen.

Bis op verschidden Ausname kënnen all déi Liewensmëttelen importéiert ginn, déi net als Déiereprodukter agestuift sinn. Heibäi muss ee just d'Wuerewäertgrenz vun 150 Schwäizer Frang beuechten.

LIEWENSMÛTTEL

Bei follgende Produiten dærf ee just eng gewësse Quantitéit an d'Schwäiz importéieren. Wann een eng gréisser Quantitéit dobäi huet, muss een Douanestaxe bezuelen. Eng einfach Method, fir d'Wuere korrekt ze verzollen, ass per App (www.quickzoll.ch). Ier een an d'Schwäiz areest, gëtt een d'Quantitéit vun all de Wuere

un, déi een ze verzollen huet. D'App berechent dann, wéi vill een nach bezuele muss. D'Quantitéiten, déi erlaabt sinn, an d'Unzuel vun de Persounen déi mat engem reesen, ginn do mat betruecht. Doniewent gëtt et nach d'Méiglechkeet, d'Wuere op der Grenz selwer unzemellen.



PRODUIT	MAX. QUANTITÉIT/ PERSON / DAG	ZOLL FIR ZOUSÄTZ- LECH QUANTITÉIT
Fleesch, Fësch a veraar- becht Fleesch (ofgesinn vum Wëld)	1 Kilo	bis 10 kg: 17 CHF/kg méi wéi 10 kg: 23 CHF/kg
Botter oder Ram	1 Kilo/Liter	16 CHF pro kg/Liter
Fett, Ueleg a Margarine	5 Kilo/Liter	2 CHF pro kg/Liter
Gedrénks mat engem Alko- holsgehalt bis zu 18% vol.*	5 Liter	2 CHF pro Liter
Gedrénks mat engem Alko- holsgehalt iwwer 18% vol.*	1 Liter	15 CHF pro Liter
Gedrénks mat engem Alkoholgehalt bis zu 0,5% vol. gëllt net als alkoholescht Gedrénks.		
Zigaretten/Zigaren*	250 Stéck	0,25 CHF pro Stéck
Aner Tubaksproduiten*	250 Gramm	0,10 CHF pro Gramm
Nikotinhaltig Flëssegkeeten	250 Milliliter	0,25 CHF pro Milliliter
Elektronesch Eweezigaretten	25 Stéck	2,50 CHF pro Stéck

*nëmme Persounen iwwer 17 Joer

Eng einfach Method, fir d'Wuere korrekt ze verzollen, ass per App (www.quickzoll.ch). Ier een an d'Schwäiz areest, gëtt een d'Quantitéit vun all de Wueren un, déi een ze verzollen huet. D'App berechent dann, wéi vill een nach bezuele muss. D'Quantitéiten, déi erlaabt sinn, an d'Unzuel vun de Persounen déi mat engem reesen, ginn do mat betruecht. Doniewent gëtt et nach d'Méiglechkeet, d'Wueren op der Grenz selwer unzemellen.

Planzen:

Verschiede Planzen däerf een net mat an d'Schwäiz huelen. Eng Iwwersicht fënns du ënner dësem Link:

www.cites.ch



Hausdéieren:

Hënn, Kazen a Frettercher däerfe mat an d'Schwäiz geholl ginn.

Folgend Viraussetzunge mussen just erfëllt sinn:

- D'Déier brauch en offiziellen Impfpass
- D'Déier muss en Chip oder eng gëlteg Tätowéierung hunn
- D'Déier muss géint Tollwut geimpft sinn (D'Impfung muss mindestens 30 Deeg al sinn an däerf net méi laang wéi e Joer zréck leien).

Plënneren:

Wann s du fir d'éischt an d'Schwäiz plënners, däerfs du theoretesch dat mat iwwer d'Grenz huelen, wat dir och

virdu gehéiert huet a wat s du an der Schwäiz fir ze wunne brauchst. An der Reegel muss alles, wat méi nei wéi ee Joer ass, verzollt ginn.

Douaneskontrolle gi bei der Arees mam Auto, mam Zuch, mam Bus a mam Fliger gemaach. Et ass och méiglech, dass een an der Schwäiz selwer ugehalen a kontrolléiert gëtt.

AUTO AN DER SCHWÄIZ

Soubal een e Wunnsätz an der Schwäiz huet (et zielt den Datum vum Auslännerausweis), däerf een nach ee Joer laang mat sengem lëtzebuergesche Führerschäin an der Schwäiz fueren. No engem Joer ass de Führerschäin an der Schwäiz net méi gültig. Dann huet een zwou Méiglechkeeten:

1) Bewilligung zum Benutzen eines unverzollten Fahrzeuges (Zollbewilligung 15.30)

Dëst muss ee beim Zoll ufroen, an et kritt een et an der Reegel och geneemegt, wann een ugëtt, dass een op d'mannst zwee mol de Mount zréck op Lëtzebuerg fiert. Dofir brauch ee folgend Saachen:

- e Pass/eng Carte d'identité
- d'Pabeiere vum Auto (Gro Kaart)
- den Auto muss op ee selwer ugemellt sinn (net op d'Elteren oder soss e Familljemember)
- e Certificat de scolarité
- en Auslännerausweis
- e Certificat de résidence vu Lëtzebuerg
- 25 CHF
- e Contract de location vun denger Wunneng an der Schwäiz

Ass dëst bis gemaach, däerf een an der Schwäiz just nach mat sengem eegenen Auto fueren a soss dierf keen op dësem Auto fueren. Allerdéngs brauch een dann eng Geneemegung, fir mat sengem lëtzebuergesche Führerschäin an der Schwäiz fueren ze kënnen. Dës Demande gëtt vum Zollamt un d'Strassenverkehrsamt virugeleet, dat engem déi entspreichend Pabeieren dann zouschéckt. Do muss du dann nach eng Kéier 120 CHF bezuelen. D'Autorisatioun kriss du heemgeschéckt an du solls déi och zu all Moment bei dir hunn.

2) Ëmschreiw vum Lëtzebuergesche Führerschäin an e Schwäizer Führerschäin

Et kann ee säi Lëtzebuergesche Führerschäin an e Schwäizer Führerschäin ëmschreiw loosse. Jee no Kanton, kann een dat nach bis zu fënnef Joer nom Areesen an d'Schwäiz maachen. Et muss een dofir en Aentest bei engem Aendokter/Optiker an der Schwäiz maachen, e Formular ausfüllen a säi Führerschäin beim Strassenverkehrsamt ofginn. Dat Ganzt kascht ongeféier 120 CHF. Dono kritt een de Schwäizer Führerschäin heem geschéckt. De Lëtzebuergesche Führerschäin gëtt weider op Lëtzebuerg geleet. Weider Informatiounen, fir de Führerschäin ëmzeschreiw ze loosse, fënns du

um Site vum „Strassenverkehrsamt“ ënner dem Thema „Führerausweis“

strassenverkehrsamt.ch



Et ass méiglech, dass een nach zousätzlech Fuersécherheetstraininge muss maachen (änlech wéi zu Colmer-Bierg). Wann s du däi Führerschäin den Dag vun der Arees scho méi laang wéi ee Joer hues, muss du kee Fuersécherheetstraining maachen. Am anere Fall muss du ee maachen. Dëst ass onofhängeg dovunner, wéi laang ee schonn an der Schwäiz ass oder säi lëtzebuergesche Führerschäin schonn huet, wann een de Führerschäin ëmschreiw léisst. De Cours kascht tëschent 300 a 400 CHF. Wichtig ass, dass ee mat engem Schwäizer Führerschäin innerhalb vun der Schwäiz just nach däerf mat Autoe fueren, déi an der Schwäiz immatrikuléiert sinn (wann z. B. d'Eltere mat engem Auto, deen zu Lëtzebuerg immatrikuléiert ass, op Besuch kommen, däerf een net dorop fueren!). Fir säin Auto an der Schwäiz ze immatrikuléieren, muss een deen importéieren, an zwar andeems een eng TVA vu 7,7% um Akafspräis oder



dem aktuelle Maartwäert bezilt. D'Schwäizer verstinn hei kee Spaass. Wann een no engem Joer mat sengem lëtzebuergesche Führerschäin duerch d'Schwäiz fiert, gëtt dëst ugesinn, wéi wann een kee Permis hätt. Des Weidere muss een och eng héich Geldstrof bezuelen, wann een net mam richtegen Auto ënnerwee ass an een dobäi erwëscht gëtt.

ËFFENTLECHEN TRANSPORT

D'Schwäizer Zuchnetz ass extrem effizient, esou dass ee vill Plaze mam Zuch erreeche kann. Allerdéngs sinn d'Zuchbilljeeë relativ deier, esou dass mir dir roden, dir de sougenannten „Halbtax“-Pass zouzeleeën. Dëse kascht 120 CHF fir Jugendlecher tëschent 16 a 25 Joer an 190 CHF fir Passagéier iwwer 25 Joer (Stand Abrëll 2025) an erlaabt et dir, all Zuchbilljee zum hallwe Präis ze kafen.

Eng Alternativ wier den „GA Night“, deen 99 CHF d'Joer kascht, a mat deem een tëschent 19:00 a 5:00 Auer ouni weidere Billjee den Zuch huele kann. Dëst gëllt awer just fir Jugendlecher ënner 25 Joer.

PERMIS DE SÉJOUR / AUSLÄNNERAUSWEIS

All auslännesch:e Student:in muss ee Permis de séjour (B-Schäin) besëtzen. Dëse kascht 65 CHF. Fir esou ee Permis de séjour ausgestallt ze kréien, muss ee sech beim zoustännege „Service de la population“ vu sengem Wunnuert mellen a folgend Dokumenter mathuelen:


- e Certificat de scolarité
- eng Passfoto
- e gëltege Pass oder eng Carte d'identité
- eng Attestatioun vun den Elteren, dass si fir de Studium opkommen

SCHWÄIZER FRANG (CHF)

An der Schwäiz gëtt a Schwäizer Frang bezuelt. Dës Währung kanns du dir ganz einfach op all Lëtzebuurger Bank besueren. Du muss hei just drun denken, d'Suen 2-3 Deeg am Virus ze bestellen, fir sécher ze sinn, dass du se zur Zäit kriss. Et kann een awer och mat senger lëtzebuergescher Bancomatskaart Suen an der Schwäiz ophiewen an och mat der Visas- oder Bancomatskaart an de Geschäfte bezuelen. Wann s du an engem Geschäft mat denger Kaart bezils, këns du am beschten ewech, wann s du a Schwäizer Frang bezils (du kanns dat um Kaartenapparat auswielen).

Méi Informatiounen zum aktuelle Cours de change fënns du ënner :

www.bcee.eu/cours/change





**En panne ?
Même pas peur !**



OG05.2025FR



Assistance 24/7
Dépannage des véhicules
au Luxembourg et en Europe



Avantage New Driver
Carte Europe gratuite
pour les jeunes conducteurs*



Services mobilité et conseils
Location aux jeunes conducteurs,
diagnostic lors de l'achat
d'un véhicule d'occasion



Karting pour tous les âges
Les joies du pilotage
et le plein de sensations,
unique au Luxembourg !

* voir conditions sur notre site

Obwuel Éisträich net grad ëm den Eck läit, fanne vill Lëtzebuurger Student:innen de Wee bis dohin. D'Informatiounen, déi s du onbedéngt wësse muss, wann s du an Éisträich studéiers, fënns du hei!

AUTOSVIGNETTE

An Éisträich ass ee verflcht, eng Vignette ze kafen, fir kënnen iwwe déi éisträichesche Autobunn ze fueren. Hei kritt een dräi verschidde Vignetten:

- Eng Vignette fir een Daag: 9,30€; 3,70€ (Moto)
(nëmmen digital)
- Eng Vignette fir zéng Deeg: 12,40 € ; 4,90€ (Moto)
- Eng Vignette fir zwee Méint: 31,10 € ; 12,40 € (Moto)
- Eng Vignette fir ee Joer: 103,80 € ; 41,50€ (Moto)

Beim Kaf vun enger Joeresvignette muss een oppassen, vu dass déi ëmmer ab dem 01. Januar vum aktuelle Joer ufänkt. Wann een d'Joeresvignette also réicht am September kafe géif, géif déi Vignette och nëmmen bis den 31. Dezember lafen an et misst en sech dann ab dem 01. Januar vum neie Joer eng nei kaafen.

Dat heescht dass déi Joeresvignette net ab dem Datum vum Kaf een Joer leeft, mee just bis zum Ufank vum neie Joer.

D'Vignettë fir zwee Méint an 1 Joer si beim Online-Kaf réicht och réicht no 18 Deeg gëlteg. D'Vignettë fir 1 an 10 Deeg kënnen online och mat enger direkter Gëltegkeet kaf ginn.

Déi verschidde Vignette kritt een op der Grenz oder beim ACL:



ACL Bertrange
54, route de Longwy
L-8080 Bertrange
Tel.: +352 45 00 45-1
www.acl.lu

ACL Ingeldorf
34, route d'Ettelbruck
L-9160 Ingeldorf
Tel.: +352 45 00 45-2
www.acl.lu

D'Vignette kann een och online kafen op: shop.asfinag.at oder an der ASFINAG App.

ORF-BEITRAG

An Éisträich gött et de sougenannten "ORF-Beitrag". Des Käschte setze sech aus Radio- an Televisiounstaxen zesummen. Aktuell ass ee vun dësem Bäitrag befreit, wann ee seng Wunneng an Éisträich als Niewewunneng ugemellt huet.

Wann ee seng Wunneng als Haaptwunneng ugemellt huet, si just déi éisteräichesche Student:innen, déi eng Studiebäihëllef an Éisträich kréien, vun dësem Bäitrag befreit. Dëst bedeit, dass net éisteräichesche Student:innen dozou verpflichtet sinn, dëse Beitrag ze bezuelen.


D'Taxeflicht fänkt den éischten Dag vum Mount un, ab dem een ugemellt ass. Hei ass et dann och egal ob s du eng Televisioun oder e Radio hues.

Bei Froe kanns du dech zu all Moment per Mail (contact@acel.lu) bei eis melden.

KFZ

Et ka virkommen dass Lëtzebuurger Student:innen an Éisträich vun der Police ugehale ginn oder ee Bréif kréie wou da behaupt gött dass si hiren Auto missten am Land vun hirem Studium umelle.

Hei göllt déi nämlechte Demarche wéi op der Säit 16.



MELDEFLICHT

Laut Gesetz besteet an Éisträich eng Meldeflicht. Wann s du méi wéi dräi Méint an Éisträich wunns, muss du dech um Gemengenamt oder um Bezirksamt (fir Wien) umellen. Dëst muss du an Zäit vun dräi Deeg, nodeems du an deng Wunneng erageplënnert bass, maachen. Dofir brauchst du deng Carte d'identité an och den ausgefüllten Umeldungsformulaire, deen s du ënner folgendem Link fënns:

www.oesterreich.gv.at/formsearch/form/233



Zousätzlech brauch ee bei engem Openthalt vu méi wéi 3 Méint eng "Anmeldebescheinigung" déi als Beweis fir en Openthaltrecht, an Éisträich, funktionéiert. Dës Dokument ass ënnerhalb vun den éischte 4 Méint bei der zoustänneger Behörd unzefroen.

Weider Informatiounen zu dëser Prozedur fënns du iwwer de Link:

www.oesterreich.gv.at/themen/leben_in_oesterreich/aufenthalt/4/2/Seite.120810.html

Op dëser Internetsäit fënns du och nach wieder Informatiounen zu der Umeldung an Éisträich:

www.oesterreich.gv.at



Prozedur
Openthalt



Infoen iwwer
d'Umeldung



CHAMBRE DES SALARIÉS
LUXEMBOURG

UNE INSTITUTION QUI DÉFEND LES INTÉRÊTS DES ÉTUDIANTS ET DES APPRENTIS

La **Chambre des salariés** est ta voix dans la procédure législative et dans de nombreuses commissions consultatives dans le domaine de l'éducation et de la formation professionnelle.

1.

Télécharge gratuitement des publications

dédiées aux aides financières pour **les études supérieures**, aux contrats et stages d'étudiants, au droit du travail et de la sécurité sociale...



2.

Abonne-toi à nos newsletters

pour rester informé sur l'évolution de tes **droits** et sur l'évolution socio-économique du pays.



3.

Participe à des formations continues

en complément de ta formation initiale via le Luxembourg Lifelong Learning Centre (**LLLC**).



Pour obtenir plus d'informations, scanne les codes QR ou visite nos pages www.CSL.lu | www.LLLC.lu

**YOU'LL
NEVER
WORK
ALONE.**

Du studéiers e bësse méi wäit ewech vun doheem an hues nach déi eng oder aner Fro zum Liewen op der brittescher Insel? Hei fënns du nützlich Informatiounen ronderëm däi Studenteliewen a Groussbritannien. Lies dës Informatiounen zum post-Brexit, dem Hall of Residence an dem Master of Arts duerch!

WAT ÄNNERT SECH FIR D'STUDENT:INNEN NOM BREXIT?

D'Transitiounsphas vum Brexit, dem Austrëtt vu Groussbritannien aus der EU, ass eriwwer. Follgend Konditiounen falen elo fir Lëtzebuurger Student:innen un:

Ännerungen zu den ‚Status fees‘ (Studiegebühren)

Wann s du däi Studium nach virum 31. Juli 2021 ugefaangen hues, bezils de „Home fees“.

All Student:in, deen/déi d'Studium nom August 2021 ufänkt, bezilt „International fees“.

Visa fir ze studéieren

Wann s du däi Studium an England, Schottland, Wales oder Nordirland am September ufänks, brauchst du elo e Visa, fir kënnen a Groussbritannien anzereesen. Dofir brauchst du also och e Pass.

Dëse Studentevisa kascht 524 £ a wéi laang e gëlteg ass, dat hänkt vun dengem Studium a Studiendauer of.

Als Deel vun der Ufro fir däi Visa muss du dech och fir d'Krankekeess (healthcare surcharge) umellen. Heifir läit de Präiss aktuell fir Student:innen bei 776 £ pro Joer.

Fir eng Visa-Ufro kënnen ze maachen, brauchst du dës Dokumenter:

- en aktuelle Pass
- eng Confirmatioun vun der Uni, dass du fir däi Studium ugeholl bass (Confirmation of Acceptance for Studies [CAS])

Hei fënns du weider Informatiounen:

www.gov.uk/student-visa

www.gov.uk/healthcare-immigration-application/how-much-pay



Student Visa




Healthcare
Immigration

Wann s du während dengem Openthalt a Groussbritannien Schwieregkeeten hues, kanns du dech bei der Ambassade zu London mellen:

*27 Wilton Crescent -
LONDON SW1X 8SD
Tel.: (+44-20) 7235 6961
londres.amb@mae.etat.lu*

BREXIT A SCHOTTLAND

Leider ass et a Schottland elo esou, dass d'SAAS (Students Awards Agency Scotland) deng Aschreiwungsfraisen op der Uni NET méi iwwerhëlt.



UREESEN

Am einfachsten a séierste kënns de mam Fliger an England oder Schottland. Et gëtt leider keen Direkt-Vol méi bis an déi schottesch Hauptstadt. Fir a Schottland ze reesen, kanns du entweder den Zuch huelen, oder Flig vum Findel aus buchen. Hei muss du dann awer zum Beispill zu Amsterdam, London oder Paräis ëmsteigen.

HALL OF RESIDENCE

A Groussbritannien hunn déi meescht Universitëten hir eege Wunnheemer fir Student:inne. Meeschtens sinn dat miwweléiert Wunnenge mat enger Gemeinschaftskichen, enger Toilette, engem Buedzëmmer an eventuell engem Gemeinschaftsraum. Dat nennt een en „Hall of Residence“.

Jee no Wunnheem huet een eng komplett Verfleegung, eng hallef Verfleegung oder guer keng Verfleegung. A verschiddene Wunnheemer sinn d'Geschlechter getrennt. Et ginn der awer och, wou se gemëscht sinn. Oft gi Porte-ouvertes organiséiert, fir dass ee sech e Bild vum Wunnheem ka maachen.

An dese Wunnheemer ass et meeschtens sou, dass een no sengem éischten Unisjoer an eng aner Wunneng plënnere muss. A verschidde Fäll kann een och méi wéi ee Joer am Wunnheem bleiwen, wa genuch Plaz ass.

Oft ass et esou, dass een eng Kautioun hannerleeë muss, fir kënnen am Wunnheim ze wunnen. D'Käschte fir d'Heizung, de Stroum an d'Waasser sinn normalerweis am Präis mat abegraff.

Student:inne mussen déi sougenannt „Council Tax“ net bezuelen, egal, ob se an engem Studentewunnheim wunnen oder privat eng Wunneng lounen.

An dëse Residenzen ass et oft esou, dass ee pro Wäsch (Trockner), déi ee mécht, bezuele muss (ëm 3€ pro Wäsch).

D'Studentewunnheemer befanne sech meeschtens no beim Unis-Campus, sou dass een net muss mat deieren Transportkäschte rechnen, fir op d'Uni ze kommen.

E weidere Virdeel vun engem Studentewunnheim oder enger Wunneng, déi vun der Uni geréiert gëtt, ass, dass een och alles online verwalte kann. Bei Privatwunnenge muss een oft, awer net ëmmer, op der Plaz sinn, fir d'Modalitéiten ze klären. Ausserdeem gëtt bei Privatwunnege meeschtens e sougenannten „Guarantor“ verlaangt –

eng Persoun déi a Groussbritannien wunnt, déi dofir biergt, dass de Loyer bezuelt gëtt. Falls ee keng esou eng Persoun kennt, muss ee meeschtens e puer Méint Loyer am Viraus bezuelen.

Méi Informatiounen fënns du ënner folgende Links:

www.mystudenthalls.com



www.southampton.ac.uk/student-life/accommodation



www.uky.edu/housing/residence-halls



MASTER OF ARTS

A Schottland ass et esou, dass wann ee véier Joer op enger Universitét studéiert huet an de sougenannten „Undergraduate Master“ gemaach huet, dësen zu Lëtzebuerg net als Master unerkannt gëtt an och net der klassischer Master-Formatioun entsprécht.

„Master of Arts“ ass eng ierféierend Bezeichnung vum Bachelor a Schottland. Dat heescht am Kloertext, dass dësen „Undergraduate Master“ zu Lëtzebuerg net als Master, mee just als Bachelor unerkannt gëtt, och wann den Undergraduate véier Joer dauert, also aacht Semester an ëmgerechent 240 ECTS wäert ass. Wien duerno nach motivéiert ass, e

„Postgraduate Master“ ze maachen, kann dëst an engem Kalennerjoer, dat aus dräi Semestere besteet, maachen.

Doniewent ass et och wichtig ze wëssen, dass e Bachelor net un der Unzuel vun de Jore gemooss gëtt, déi een op der Uni oder der Héichschoul mécht, mee un der Unzuel vun ECTS-Punkten, déi een a sengem Studium erreecht. Op ville engleschen a schotteschen Unien ass et esou, dass net mam ECTS-System gefuer gëtt, mee mat engem eegene Punkte-System an all Joer ee pauschale Wäert u Punkten zougerechent gëtt. D'Equivalenz vun den ECTS zu dëse „Credits“ ass 1:2. Deemno géifen zum Beispill 30 ECTS 60 schottesche „Credits“ entsprechen.



Holland ass eng Studiendestinatioun, déi ënnert de Lëtzebuurger Student:innen ëmmer méi beléift gëtt. Hei fënns du Informatiounen, déi fir e Studium an Holland wichteg ze wësse sinn!

TESTER ALS VIR AUSSETZUNG

Sproochnoweis (IELTS, TOEFL, asw.):

Fir an Holland studéieren ze kënnen, ass et wichteg, dass een e gudden Niveau am Engleschen huet. Dat gëllt souwuel am Mëndlechen, am Liesen, ewéi och am Schrëftlechen. Fir dës Kenntnisser nozeweisen, gëtt op munchen Unie mol e Sproochentest gefrot. Meeschtens gëtt den IELTS- an den TOEFL-Test (&TOEFL IBT Home edition) vun den hollänneschen Universitëiten akzeptéiert. Et kënnen awer och aner Tester gefrot ginn, ewéi zum Beispill de Cambridge English Test. Am beschten informéiers du dech am Virus bei der Uni vun denger Wiel, ob se esou en Test verlaangt a wa jo, wéi ee vun de verschiddenen Tester verlaangt gëtt an och wéi een Test d'Universitëit net akzeptéiert.

Méi Informatiounen zu deene verschiddenen Tester fënns du hei:

TOEFL TEST:
www.ets.org/fr/toefl/test-takers/



IELTS TEST:
www.ielts.org



CAMBRIDGE ENGLISH TEST:
www.cambridgeenglish.org



INLL SPROOCHENZERTIFIKATER:
www.inll.lu/fr/certifications/



UMELDUNG OP DER GEMENG



EU-Student:inne brauche keng extra Openthaltsgeneemegung an Holland unzufroen. E gültege Pass oder eng Carte d'identité ginn duer. Wann s du dech méi wéi véier Méint an Holland ophäls, muss du dech awer an enger Basisregistréierungsdatebank („Basisregistratie personen“ oder BPR) an der Gemeng, wou s du wunns, androe loossen. Dëst kanns du ganz einfach mat denger Carte d'identité oder dengem Pass maachen. Du kriss dann eng sougenannte „Bürgerservicenummer“, déi s du brauchst, fir administrativ Ugeleeënheeten an Holland duerchzeféieren.

Méi Informatiounen fënns du um Site vun der Gemeng, an där s du wunns oder ënner:

www.government.nl/topics/personal-data/citizen-service-number-bsn



Government
Citizen Service

Aneren Noweis:

Deemno fir wéi ee Bachelor ee sech umellt, muss een aner Kenntnisser noweisen. Sou kann et zum Beispill sinn, dass ee fir e Bachelor of Science e Mathéstest maache muss. Dëst hänkt vun der jeeweileger Uni of. Informéier dech also fréi genuch bei der Uni vun denger Wiel.



KRANKEVERSÉCHERUNG

Als Student:in brauch ee keng Krankeversécherung an Holland ofzeschléissen, och wann ee per Bréif dozou opgefuerdert gëtt. Et soll een déi zoustänneg Administratioun awer a Kenntnis setzen, dass ee vu Lëtzebuerg aus verséichert ass, soss muss een eventuell eng Strof bezuelen.

Falls een awer an Holland schafft, muss een eng hollännesch Krankeversécherung ofschléissen.

VËLO

Opgrond vun dem awer zimmlech deieren ëffentlechen Transport ass et an Holland quasi en absolute Muss, sech mam Vëlo a senger Studiestad ze deplacéieren. Hei ass et awer och wichtig, sech e gutt Schlass zouzeleeën, fir dass ee säi Vëlo net vun Onéierleche geklaut kritt.

Dat ass generell een Virdeel fir Student:innen a Staat, vu dass d'Infrastrukture fir d'Vëloen an hollännesche Stied zimmlech gutt ausgebaut sinn.





Wann s du méi wäit ewech studéiere wëlls goen, däi kulturrellen Horizont wëlls erweideren an eng ganz nei Erausforderung wëlls erliewen, sinn d'USA déi perfekt Destinatioun fir dech.

TESTER ALS VIRAUSSETZUNG

Sproochnoweis:

Fir an den USA studéieren ze kënnen, muss een e gudden Niveau am Engleschen hunn, souwuel am Mëndlechen ewéi och am Liesen an am Schrëftlechen. Fir dëst nozeweisen, kann een op munchen Unien e Sproochentest gefrot ginn. Meeschtens gëtt den IELTS- an den TOEFL-Test vun den amerikaneschen Universitëiten akzeptéiert. Et kënnen awer och aner Tester vun den Universitëite gefrot ginn, ewéi zum Beispill de Cambridge English Test. Am beschten informéiers du dech hei am Virus bei der Uni, ob si esou een Test verlaangen a wa jo, wéi een néideg ass.

Méi Informatiounen zu de Sproochentester fënns du hei:

www.internationalstudent.com/study_usa/application-process/standardized-tests/overview/

www.inll.lu/lu/zertifikatiounen/



International
Student



Institut national
des langues

SAT/ACT Standardized tests

Dës Tester gi vu villen, awer net allen, Unie gefuerdert a spillen eng grouss Roll bei der Héicht vum Scholarship (méi dozou op der nächster Säit), deen een eventuell ka kréien. Et muss ee laang am Virus plangen, wéini een den Test schreift. Online fënnt een och gratis Preparatiounstester a Bicher, déi engem hëllefen, sech dorobber virzebereeden. Vu dass et net nëmme wichteg ass, den Test ze packen, mee och e gudden Score ze errechen, ass et recommandéiert, sech gutt a laang genuch am Virus op den Test virzebereeden.

Den SAT evaluéiert zu 50% deng Mathéskompetenzen an zu 50% deng englesch Sproochkenntnisser. Den ACT verdeelt seng Schwéierpunkten op Englesch, Geschicht, Sproochen, Wëssenschaften a Mathé.

Am beschte mécht een den Test méi wéi eng Kéier, fir dass ee genau weess, wat op een duerkënnt. Zu Lëtzebuerg kann een den Test op der International School of Luxembourg (ISL) schreiwen.

Méi Informatiounen dozou fënns du ënnen:

satsuite.collegeboard.org

global.act.org

www.educationusa.be/undergraduate-studies/admission-test/sat/



collegeboard.org



act.org

U.S. VISA

Fir kënnen an den USA ze studéieren, brauchst du en U.S. Visa („student visa“). Fir deen ze kréien, muss du fir d'éischt online de sougenannten „DS-160“-Formular ausfüllen. Wann s du alles aginn hues, muss du drun denken, d'Bestätegungssäit erauszedrücken.

Nodeems du däi VISA bezuelt hues, muss du e Rendez-vous op der amerikanescher Botschaft oder dem Konsulat ausmaachen, fir e Visa ze kréien. Dëst kann eng Zäitchen daueren, dofir rode mir dir, d'Demande fir de Visa sou frei wéi méiglech ze maachen.

Fir deng Demande ze komplettéieren, brauchst du folgend Dokumenter:

- e gëltege Pass;
- en ënnerschriwwenen „Certificate of Eligibility for Nonimmigrant Student Status“ (I-20-Formular);
- d'Bestätegungssäit vum DS-160 Formular;
- d'Bestätegung vum Rendez-vous mat der Botschaft oder dem Konsulat.

Déi genau Virgoensweis ass och nach emol genau op folgendem Site erkläert:

www.ustraveldocs.com/

lu.usembassy.gov/visas/#types



U.S. Travel docs



U.S. Embassy

OPGEPASST

Säit den Donald Trump seng zweet Amtszäit ugefaangen huet ass d'Stabilitéit vum Visa-Status net méi sou sécher wéi fréier. Et gi Fäll an deenen auslännesch Student:innen hire Visa kuerzfristeg oferkannt kruten an hir Studien hu missen ofbriechen. Insgesamt ass säit der neier Regierung de ganzen Héichschoulsystem an den USA ënner héijem Drock an d'Ëmstänn kënnen sech vun haut op muer änneren.

KRANKEVERSÉCHERUNG

D'Gesetz verlaangt, dass déi Leit, déi an den USA studéieren, eng Krankeversécherung hunn.

D'Käschte fir d'Gesondheetsdéngschtleeschunge kënnen ganz anescht ausfale wéi zu Lëtzebuerg. Dofir rode mir dir, eng zousätzlech Krankeversécherung ofzeschléissen. Am beschte frees du do bei denger Zousatzversécherung zu Lëtzebuerg no, fir weider Informatiounen ze kréien.

Déi meescht Unie bidde fir hir international Student:innen eng Krankeversécherung un. Dës bezilt een automatesch, ausser et kann een noweisen, dass een eng zousätzlech Krankeversécherung huet. Am beschte frees du bei der Uni selwer no, wat se de Student:innen ubitt.

SCHOLARSHIP

Et ass gewosst, dass Amerika net dat bëllegst Land ass, fir ze studéieren. Eng Bourse kann do scho ganz nätzlech sinn. Eng Bourse ass eng finanziell

Hëllef, déi als Zil huet, d'Student:innen ze fërderen. D'amerikanesch Universitéite bidden och internationale Student:innen eng Rei Bähëllef un. Wien eng Bourse an den USA kritt, hänkt ganz vun de Modalitéite vun der jeeweileger Bourse of. Et gëtt also keng generell Reegel. Fir verschidde Bourse muss een eng gewësse Punktzuel am TOEFL-Test kritt hunn oder eng gewësse Moyenne errechen. Hei muss du dech also informéieren, wéi eng Bourse fir dech a Fro komme géif. Dëst ka sech duerchaus als komplizéiert erweisen. Am beschte frees du direkt bei der Uni no.

SUE BLOCKÉIEREN

Fir an den USA studéieren ze kënnen, muss du garantéiere kënnen, dass du genuch Suen hues, fir ze liewen an deng Studiekäschten ze bezuelen. Dës Zomm gëtt folgendermoosse gerechent:

Du muss dat ganz Schoulgeld („tuition“) fir ee Joer a genuch Suen hunn, fir ee Joer kënnen ze iwwerliewen. Wat d'Tuition ubelaangt, gëtt scho mat a Betruecht gezunn, ob s du e Scholarship vun der Uni krus (dëse gëtt dann ofgerechent).

All Uni gesäit do eng aner Zomm vir, wat d'Liewenskäschten ubelaangt, well dat hänkt vun der Stad of, wou s du wunns (New York ass zum Beispill méi deier). Normalerweis stinn dës Montanten op der Uni hirer Internetsäit.

STUDENT:INNE-JOB

An den USA däerfs du, als internationale Student:in, niewent dem Studium schaffe goen, awer ausschliisslech op der Uni an nëmme

wann s du am Besëtz vun engem F-1-Visa bass. Dëst ass folgendermoosse reglementéiert:

- 20 Stonnen d'Woch niewent de Coursen op der Uni;
- Vollzäit an deene Perioden, wou ee keng Coursen op der Uni huet.

Fir weider Informatiounen kanns du dech beim Beroder fir auslännesch Student:innen op denger Uni mellen.

DOLLAR

An den USA gött mat Dollar bezuelt. Dës Wäring kanns du dir ganz einfach op all Lëtzebuerger Bank besuerger. Du muss hei just drun denken, d'Suen 2-3 Deeg am Viraus ze bestellen, fir sécher ze sinn, datt s du se zur Zäit kriss. Denk drun, dass du an den USA just mat enger Kreditkaart (Visa, Mastercard, asw.) an net mat denger Debitskaart (V PAY, Maestro, Axxess asw.) an de Geschäfte bezuele kanns. Mir roden dir, en amerikanesche Kont opzemaachen. Dëst kanns du bei all belibeger Bank an Amerika maachen. Dofir brauchst du e gëltege Pass an eng Adress an Amerika op där s du wunns. Falls weider Dokumenter gebraucht ginn, kriss du dat vun der jeeweileger Bank matgedeelt.

Méi Informatiounen zum aktuelle Cours de change fënns du ënner:

www.bcee.eu/cours/change



INTERNATIONALE FÜHRERSCHÄIN

Wann s du an den USA studéiers an do mam Auto fuere wëlls, brauchst du en internationale Führerschäin (däi lëtzebuergesche Führerschäi geet net duer).

Dëse kanns du beim ACL ausgestellt kréien. Dofir brauchst du folgend Dokumenter: e gültege Führerschäin ausgehännegt vun engem Memberland vun der EU, en aktuelle Certificat de résidence vun denger Gemeng (deen net méi al wéi dräi Méint däerf sinn) an eng aktuell Passfoto vun dir. De Führerschäi kascht 16 € fir ACL-Memberen (30 € fir Net-Memberen) an ass maximal dräi Joer gëlteg. Zousätzlech zum internationale Führerschäi muss du och ëmmer däi lëtzebuergesche Führerschäin dobäi hunn.

Méi Informatiounen fënns du direkt beim ACL ënner:

www.acl.lu/de/mobilitat/service-beratung/internationaler-fuehrerschein/



WUNNENGSSICH

Wann s du méi wäit ewech vu Lëtzebuerg studéiers, brauchst du eng Wunneng. Du hues d'Méiglechkeet, an e Student:innenwunnheim ze goen oder en Appartement bzw. e Studio ze lounen. Heibäi ginn et eng Rei Saachen, déi s du dofir wësse solls!

WÉI FËNNT EEN AM BESCHTEN ENG WUNNENG?

Et gi verschidde Méiglechkeeten, eng Wunneng ze fannen. Hautdesdaags geet dëst am beschten iwwer Internetsäiten oder iwwer Facebook, wou een och eng Rei Gruppe vu Lëtzebuenger Student:innen am Ausland fënnt, déi engem bei der Wunnengssich weiderhëllefe kënnen. Vill Student:inne maachen an dës Facebookgruppen op hir Wunneng, déi fräi gëtt, opmierksam. Oft ass et esou, dass verschidde Wunnenge vu Lëtzebuenger:innen un aner Lëtzebuenger:inne weiderverlount ginn. Natierlech besteet och d'Méiglechkeet, sech direkt bei Immobilienagencen ze mellen.

WAT MUSS ECH FIR D'WUNNENGSSICH WËSSEN?

Wann s du méi genau wëlls wëssen, wéi s du an denger Studiestad eng Wunneng kanns fannen, da kuck dir eise Guide du Futur Étudiant un. Dësen ass de verschiddene Stied no ënnerdeelt a gëtt dir déi verschidde Méiglechkeete fir d'Wunnengssich un. Du fënns en ënner www.acel.lu/gfe.

WAT ASS AM LOYER MAT ABEGRAFF?

Wann s du d'Präisser vun de Wunnenge vergläiche wëlls, dann denk drun, ze berécksiichtegen, wat alles am Loyer mat abegraff ass. Oft mengt een, eng Wunneng wär méi bëlleg, mee da stellt sech eraus, dass et sech dobäi awer ëm e Präis ouni Niewekäschten (wéi Waasser, Stroum, Liftfraisien, etc.) handelt. Fro also onbedéngt bei dem:der Proprietär:in, respektiv bei der Agence no, wat alles am Präis mat abegraff ass.

Oft ass et esou, dass de Stroum net am Loyer mat abegraff ass. Du kriss also vum Stroumbedreier eng extra Rechnung heemgeschéckt, déi s du da bezuele muss. Dëst ass just eng Virschreiwung an ass soumat net dat, wat s du tatsächlech verbraucht hues. Eemol d'Joer kriss du dann eng Ofrechnung, wou s du entweder nobezuele muss (wann s du méi verbraucht hues) oder Suen zrëckkriss (wann s du manner verbraucht hues). Och d'Internet- an d'Televisiounskäschte sinn an deene meeschte Fäll net am Loyer mat abegraff. Du muss dir also en Internet-/Televisiounsubbidder eraussichen a mat deem e Kontrakt ofschléissen.

WÉI ENG BEGRËFFER MUSS ECH KENNEN?

Wann s du da bis eng Wunneng fonnt hues, kommen eng Rei Begrëffer op dech zou.

Bierschaft:

Verschiede Proprietär:inne verlaangen eng sougenannte Bierschaft, well een als Student:in nach kee fest Akommes huet. Heibäi handelt et sech ëm eng Persoun, déi garantéiert, dass de Loyer fir d'Wunneng bezuelt gëtt. Falls du däi Loyer also net bezils, muss déi Persoun, déi fir dech biergt, dësen iwwerhuelen. Ween dës Persoun ass, gëtt meeschtens am Kontrakt festgehalten. Bei Student:innen handelt et sech meeschtens ëm d'Elteren. D'Bierger:inne mussen de Kontrakt dann och mat ënnerschreiwten.

Kautioun:

E wichtege Begrëff, deen s du bei denger Wunnengssich kennelieiere wäerts, ass d'Kautioun. Wann s du eng Wunneng louns, verlaangt de:d' Proprietär:in eng Kautioun. Et handelt sech ëm eng Zomm Suen (de Montant muss am Kontrakt festgehale sinn), déi s du un de:d' Proprietär:in bezele muss. Dës Suen dierf de:d' Proprietär:in awer net ausginn, mee déi ginn op d'Säit geluecht. Entweder iwwerweis du dem:der Proprietär:in selwer d'Kautioun oder d'Sue ginn op engem Bankkont blockéiert (garantie bancaire locative). Ob elo dat eent oder anert zoutreff, hänkt vu Fall zu Fall of.

Falls du däi Loyer net bezils oder eppes an der Wunneng futti méchs, gëtt dëst vun denger Kautioun ofgehal. Wann alles an der Rei ass, kriss du deng Kautioun zeréck, wann s du erëm aus der Wunneng erausplënners. D'Kautioun entsprécht normalerweis zwee bis dräi Loyeren.

Provisioun/Frais-d'agencen:

Bei Wunnengen, déi iwwer eng Immobilienagence vermëttelt ginn, muss ee meeschtens eng Provisioun (bzw. Frais-d'agencen) bezuelen. Dës Sue kritt een net zeréck, mee se déngen dozou, d'Agence fir hir Déngschtleeschungen ze bezuelen. Wichtig ass, dass d'Provisioun eréischt bei erfollegräicher Vermëttlung ze bezuelen ass. D'Wunnengsbesichtigunge sinn ëmmer gratis: Du muss d'Agence eréischt bezuelen, wann s du e Kontrakt ofgeschloss hues.

SCHUFA-Auskunft:

An Däitschland ass et oft esou, dass de Vermieter eng sougenannt SCHUFA-Auskunft vun dir verlangt. Déi Auskunft kann dem Vermieter versécheren, dass du respektiv deng Eltere genuch verdéngen fir d'Wunneng all Mount ze finanzéieren. Et ass awer sou, dass een ouni en däitsche Konto keng SCHUFA-Auskunft ka kréien an een an dësem Fall dem Vermieter op aner Aart a Weis muss beweisen, dass een eng Wunneng ka finanzéieren. Oft gëtt sech de Vermieter mat Gehaltziedelen zefridden, déi beweisen dass pro Mount genuch Geld zur Verfügung steet.

Wunnengsiwwergab/Etat des lieux:

Wann s du eng Wunneng louns, kënns du och mam Begrëff „Etat des lieux“ oder „Wohnungsübergabe“ a Kontakt. Heibäi handelt et sech ëm Besichtigungen, déi s du nach emol maache muss, éier s du deng Schlëssele kriss. Hei gëtt en Tour duerch d'Wunneng gemaach a sech alles ugekuckt. Et gëtt am Kontrakt (oder an engem extraen Dokument) notéiert, wann iergendeppes net funktionéiert (de

Schäffchen, e Luuchteschalter, e Krunn, etc.) oder wann iergendwou eng Téitsch oder e Fleck an der Mauer oder am Buedem ass. Denk drun, hei alles gutt ze kontrolléieren, net dass du dono dofir opkomme muss, wann s du erëm erausplënners. Denk och drun, dass alles, wat am ënnerschriwwene Kontrakt mat der Hand bäigefügt gëtt, nach emol ënnerschriwwene muss ginn (hei geet eng Paraph duer). Am beschten ass och, wann s du vun allem Fotoe méchs, fir op Nummer sécher ze goen.

Zum Schluss vun dengem Kontrakt, also wann s du aus der Wunneng erausplënners, gees du nach emol mat dem:der Proprietär:in (oder enger Persoun vun der Agence) duerch d'Wunneng. Hei gëtt da gekuckt, ob an der Wunneng alles an der Rei ass. Falls iergendeppes net méi funktionéiert oder futti ass, dierf de:d' Proprietär:in de Reparationspräis vun der Kautioun, déi s du bezuelt hues, ofrechnen.

WÉI KRÉIEN ECH DANN ELO MENG SAACHEN A MENG NEI WUNNENG?

Wann s du an deng Studiestad plënners, wëlls du sécherlech eng Rei Saache vun doheem mathuelen. Eventuell hues du jo och schonn e puer Miwwelen, déi s du mat an deng nei Wunneng huele wëlls. Schnell ass do den Auto net méi grouss genuch an et muss ee puer Mol de Wee an d'Unisstad fueren. Dëst ass alles anescht wéi praktesch, zemools wann een net grad ëm den Eck studéiert. Och wann ee keen Auto zur Verfügung huet, stellt sech d'Plënnere als extrem komplizéiert eraus.

Interessant ass et dofir beim ACL ClubMobil (Automobil Club) en Auto oder eng Camionnette ze lounen. Hei sinn eng Rei Autoskategorïe souwéi och zwou verschidde Gréisste vu Camionnetten (6m³, 11,50 m³, 13 m³, oder 15 m³) ze kréien. Als ACL-Member kann een hei vun ongeféier 25 % Remise profitéieren. Reservéiere kann een den Auto oder d'Camionnette ënner www.clubmobil.lu. Fir weider Informatiounen kanns du dech beim ACL mellen:



ACL ClubMobil Bertrange
54, route de Longwy
L-8080 Bertrange
Tel.: +352 45 00 45-6100
www.acl.lu

ACL ClubMobil Ingeldorf
34, route d'Ettelbruck
L-9160 Ingeldorf
Tel.: +352 45 00 45-2
www.acl.lu

FINANZÉIERUNG

Studéiere goen, sief et am Ausland oder zu Lëtzebuerg, ass mat Käschte verbonnen an dofir gräift de Lëtzebuergeser Staat de Student:innen ënnert d'Äerm.

Zu Lëtzebuerg këmmert de Service Aides financières vum Ministère fir Héichschoul a Fuerschung sech ëm d'Gestioun vun der finanzieller Hëllef, déi de Staat de Student:innen ubitt. Du kanns e per Telefon oder E-Mail kontaktéieren oder einfach am Service, dee vu méindes bis freides vu 7:45 bis 16:30 op ass, laanschtgoen.



LE GOUVERNEMENT
DU GRAND-DUCHÉ DE LUXEMBOURG

Ministère de la Recherche
et de l'Enseignement supérieur

MESR - Service Aides financières
18-20, montée de la Pétrusse
L-2327 Luxembourg

Internetsäit: www.mengstudien.lu
Tel.: (+352) 247 - 88650
E-Mail: aidefi@mesr.etat.lu

WÉI FINANZÉIEREN ECH MÄI STUDIUM?

WÉI VILL SUEN HUNN ECH ZEGUTT?

Déi finanziell Hëllef vum Staat besteet aus engem Deel Bourse an engem Deel Prêt. D'Bourse ass deen Deel, deen een sou gesot geschenkt kritt. Dat heescht, dass een deen Deel net zeréckbezuere muss. De Prêt muss een no sengem Studium zeréckbezuelen. De Prêt ze huelen, ass optional. Et ass jidderengem fräi iwwerlooss, ob en de Prêt huele wëll oder net.

D'Bourse an de Prêt kann een 2 mol am Joer ufroen, eng kéier fir d'Wantersemester an eng kéier am Summersemester. Dofir kann een déi folgend Zuelen déi pro Semester ausgedréckt sinn och verduebele fir de Gesamtbetrag op ee Joer ze gesinn.

BOURSE (Montanten vum Joer 2025)

Basisbourse – 1.228 Euro pro Semester:

All Student:in, deen:déi op enger Universitét oder Héichschoul ageschriwwen ass, huet heirobber en Urecht.

Mobilitéitsbourse – 1.528 Euro pro Semester:

Kritt all Student:in, deen:déi ausserhalb vu sengem Wunnsätzland studéiert an do Loyer bezitt.

Sozialbourse – maximal 2.379 Euro pro Semester:

Jee nodeem, wéi héich dat besteierbaart Akommes vun den Elteren oder besser gesot, dem Stot ass, an deem een ugemellt ass, kann ee bis zu 2.379 € Sozialbourse kréien. Deen Deel, deen een net kritt, kann een als Prêt ufroen.

Familljebourse – 294 Euro pro Semester:

Kritt all Student:in, deen:déi e Brudder oder eng Schwëster huet, deen oder déi am selwechte Stot ugemellt an och op enger Uni ageschriwwen ass. Dësen Deel vun der Bourse kritt een nëmmen am Summersemester ausbezuelt, dofir ass et awer dann den duebele Betrag.

Studiefraisen – maximal 3.800 Euro pro Joer:

D'Aschreiwungs- a Studiekäschte bis zu maximal 3.800 € ginn zu jee 50% op d'Bourse an op de Prêt opgedeelt.

Härtefall – 1.000 Euro pro Joer:

Sollt ee sech an enger „situation grave et exceptionnelle“ befannen, kann een eng zousätzlech finanziell Hëllef vun 1.000 Euro ufroen, dëst an engem Bréif un de „Ministère de l'Enseignement Supérieur et de la Recherche“ adresséiert, an deem een seng Situatioun erkläert. D'Sue ginn zu jee 50 % op d'Bourse an op de Prêt opgedeelt. Diskutéiert ginn d'Härtefäll an der Commission consultative de l'aide financière, an där ënner anerem och d'ACEL vertraueden ass.

PRËT

3.250 bis 7.529 Euro pro Semester:

All Student:in ka 3.250 € Prêt ufroen. Deen Deel vun der Sozialbourse, deen een net kritt, kann een och als Prêt ufroen. Zousätzlech kenne bis zu 1.900€ fir d'Aschreiwungs- a Studiekäschten derbäi kommen. Domat kann de Prêt bis op 7.529€ klammen. Dësen ass op maximal 2% Zënse gedeckelt an ass zwee Joer nom Studium an enger maximaler Zäitspan vun zéng Joer zréckzebezuelen.

SIMULATIOUN

Um Site vum Ministère gëtt et och ee Simulator wou ee ganz einfach ka kucke wéi vill Bourse a Prêt een zegutt huet:

mengstudien.public.lu/fr/aides-financieres/aidefi/simulateur.html



Wichtig: Dës Montante sinn un den Index gekoppelt a kënnen jee nodeem variéieren.

WÉI MAACHEN ECH MENG DEMANDE?

Du muss deng Demande online iwwert MyGuichet maachen, dobäi hues du awer zwou Méiglechkeeten:

- Online oder iwwert MyGuichet App **MAT** LuxTrust / eID
- Online **OUNI** LuxTrust / eID

Méi Informatiounen fënns du um Site vum Service Aide financières vum Héichschoulministère:

mengstudien.public.lu/fr/aides-financieres/aidefi/aide-demarche.html



Fir déi gefroten Dokumenter eropzelueden, kanns du och d'MyGuichet App (**MAT** LuxTrust / eID) benotzen.

DEADLINE

- Wantersemester: vum 1. August bis den 30. November
- Summersemester: vum 2. Januar bis den 30. Abrëll

Wichtig!

Däin Dossier muss virun den uewege- nannten Deadlines eragerecht ginn, och wann nach Dokumenter an den- gem Dossier feelen an deen onvollstän- neg ass. Wann s du en onvollstännegen Dossier virun der Deadline eragerecht hues, hues du d'Méiglechkeet, spéi- der déi Dokumenter nozereechen, déi gefeelt hunn. Wann eppes feelt, kriss du iwwer MyGuichet eng E-Mail ge- schéckt.

E vollstännegen oder onvollstännegen Dossier, deen eréischt no der uewegenannter Deadline eragerecht gëtt, gëtt net méi consideréiert an et verléiert een esou säin Urecht op d'Bourse fir dat Semester.

Fro deng Bourse och am beschten den éischte Mount schonn un, well do sinn d'Waardezäiten net esou laang ewéi kuerz virun der Deadline.

WÉI LAANG KRÉIEN ECH D BOURSE?

All Student:in huet d'Bourse esou laang zegutt wéi hier Reegelstudienzäit dauert. Réischt wann een den éischten Zyklus (wéi zum Beispill ee Bachelor) ofgeschloss huet, kann een een neien Zyklus ufänke, wou een nees déi nei Reegelstudienzäit zegutt huet.

Zousätzlech huet all Student:in zwee Bonus Semesteren zur Verfügung déi iwwergräifend zu all Zyklus kënnen agesat ginn.

Als Beispill fänkt een/eng Student:in e Bachelor un dee 6 Semester dauert an huet dofir 8 Semestere Bourse zegutt. Dës:e Student:in brauch fir dese Bachelor ofzeschléissen awer 7 Semesteren. Dono well hien:hat nach ee Master maachen dee 4 Semesteren dauert. Dofir huet hien:hat dann nach 5 Semester mat dem enge Bonussemester wat aus dem Bachelor iwwereg war, een Urech top d'Bourse fir dese Masterstudium kennen ofzeschléissen.

Et ass och méiglech säi Studium ze wiesselen. Dobäi sollt een awer oppassen, well do gëtt net nees vu vir ugefaange mat zielen, mee et gëtt do wieder gezielt, wou de leschten Zyklus ugefaange gouf.

WAT ASS ...?!

Cycle:

E Cycle ass e Studiegang. De Bachelor ass deen éischte Cycle an de Master ass deen zweeten.

Sozialversicherungsnummer/

Matricule:

Hei gëtt déi nei Matricule (13 Stellen) gefrot. Dës fënns du op der Sécurité- sociales-Kaart, déi s du zouggeschéckt krus.

RIB:

De „Relevé d'identité bancaire“ (RIB) ass eng Beschäinegung, déi vun der Bank ausgestallt gëtt, a bestätegt, dass e Kont op e bestëmmten Numm leeft (méi dozou ënner „Online-Dokumenter“).

Mobilitéitsstipendium/ Bourse de mobilité:

Wann s du kee Kontrakt hues, well s du z. B. an enger WG wunns, geet eng schrëftlech Bestätegung vum Haaptlocataire oder Proprietär:in duer.

Familljestipendium/ Bourse familiale:

Dësen Deel vu 588 €/Joer gëtt nëmme bei der zweeter Tranche (Summersemester) vun der Bourse ausbezueft. Wann s du keng zweet Tranche ufrees, kanns du d'Familljebourse mat engem extrae Formulaire awer ufroen (SONSTIGE STIPENDIEN / AUTRES AIDES FINANCIÈRES). Wann s du e Subsid, deen net un e „Merite“ gebonnen ass, vun der Gemeng kriss, muss du deen hei uginn.

Online-Dokumenter:

Verschieden Dokumenter kriss du online:

[Op macommune.lu / vdl.lu](http://Op.macommune.lu/vdl.lu)

(dat ass net bei all Gemeng de Fall):

- Certificat de composition de ménage
- Certificat de résidence

[Bei der Uni](#)

(dat ass net bei all Uni de Fall):

- Frais d'inscription/Certificat d'inscription définitive
- Relevé de notes de l'année précédente

[Um Web-Banking](#)

- RIB / Bankverbindungs-nachweis / Relevé d'identité bancaire
- *Bei der Spuerkeess:*
Um S-net aloggen > „Comptes et cartes“ > „.....“ > „Relevé d'identité bancaire“
- Preuve de paiement des frais d'inscription
- Preuve de paiement de loyer

Méi Informatioun zu der Bourse fënns du ënner:

mengstudien.public.lu/fr/aides-financieres.html





KRANKE- VERSÉCHERUNG

BRAUCH ECH ENG KRANKE- VERSÉCHERUNG AM AUSLAND?

ZU LËTZEBUERG AFFILIÉIERT

Wann s du zu Lëtzebuerg wunns an op enger Uni am Ausland ageschriww bass, muss du bei enger lëtzebuergescher Krankekeess ugemellt sinn, fir d'Fraise vun der Gesondheitsversuergung am Studienland an zu Lëtzebuerg rembourséiert ze kréien. Hei hues du d'Méiglechkeet, dech entweder als Co-Versécherter (vun dengem Papp oder denger Mamm) unzemellen oder dech perséinlech unzemellen, falls eng Co-Versécherung net méiglech ass.

- Am Fall vun der Co-Versécherung ass déi zoustänneg Keess déi vum Hauptversécherter (dat heescht vun der Mamm oder dem Papp):
 - „Caisse nationale de santé“ (CNS) fir Versécherter aus dem Privatsecteur
 - „Caisse de maladie des fonctionnaires et employés publics“ (CMFEP) fir Mataarbechter:innen aus dem öffentleche Secteur
 - „Caisse de maladie des fonctionnaires et employés communaux“ (CMFEC) fir Gemengemataarbechter:innen
 - Entraide médicale des CFL pour les salariés des chemins de fer luxembourgeois“ fir Mataarbechter:innen vun der Lëtzebuenger Eisebunn.

Du kanns dech direkt bei de zoustänneg Krankekeess als Co-Versécherter umellen.

- Wann s du dech als Student:in perséinlech versécheren wëlls, ass d'Caisse nationale de santé - D'Gesondheitskeess (CNS) zoustänneg. Fir dech unzemellen, muss du de Centre commun de la sécurité sociale (CCSS) kontaktéieren.

GESONDHEITSVERSUERUNG AM STUDIELAND

Am Ausland studéiere gëllt als en temporairen Openthalt am Ausland. Et ka sinn, dass du während dengem Studium medezinesch versuergt muss ginn. Dofir ass et am beschten, déi zoustänneg Sozialversécherung op der Studieplaz ze kontaktéieren, fir méi Informatiounen iwwert d'Konditiounen vum Remboursement an d'Ofdeckung vun der Betreierung op der Plaz ze kréien. Jee nodeem, wou ee studéiert ass d'Situatioun anescht.

Fir d'Länner vun der Europäescher Unioun (EU) an dem Europäesche Wirtschaftsraum (EWR), an d'Schwäiz:

Als Student:in kanns du dech bei der zoustänneger Sozialversécherung vun dengem Studieland registréiere loossen. Dës Aschreiwung erliichtert d'Formalitéite vum Remboursement, ass awer net onbedéngt noutwendeg. Normalerweis geet et nämlech duer, wann ee seng europäesch Sozialversécherungskaart („carte européenne d'assurance maladie“) virweise kann, fir dass d'Fraisen iwwerholl ginn. Dës Betreierung gëtt dann no de gesetzleche Bestëmmunge vum Land, an deem s du dech ophäls, ausgeféiert an no den Tariffer, déi do applizéiert goufen, rembourséiert.

Déi europäesch Sozialversécherungskaart gëtt dem:der Student:in d'Recht op eng medezinesch Versuergung am Studieland, fir dass säin Openthalt a

sécherer medezinescher Konditiounen oflaffe kann, ouni dass de:d' Student:in seng:hier Behandlung a sengem:hierem eegene Land muss ënnerbriechen.

Dës Kaart kann awer nëmme bei konventionéierten Déngschtleeschter:innen benotzt ginn, dat heescht bei all Déngschtleeschter:innen, dee mat der Sozialversécherung vu sengem Land en Ofkommen ënnerschriwwen huet. Normalerweis kann déi europäesch Sozialversécherungskaart net vun engem:er autoriséierten:er Déngschtleeschter:in refuséiert ginn. Wann et sech ëm en net autoriséierten oder privaten Déngschtleeschter:innen handelt, kënnen d'Behandlungsfraisen no de lëtzebuergesche Bedéngungen an Tariffer rembourséiert ginn.

Wann een Déngschtleeschter déi europäesch Sozialversécherungskaart net akzeptéiert oder s du deng Kaart net dobäi hues, muss du d'Käschte vun der medezinescher Versuergung an enger éischer Phas selwer bezuelen an dann ee Remboursement bei der Krankekeess am Openthaltsland oder bei denger lëtzebuergescher Krankekeess ufroen:

- Wann s du d'Rechnungen an d'Krankekeess am Openthaltsland ageschéckt oder se bei hir agereecht hues, gëss du no den Tariffer an den Tauxen, déi am Openthaltsland gëllen, rembourséiert.

EU: Belsch, Bulgarien, Däitschland, Dänemark, Éisträich, Estland, Finnland, Frankräich, Griichenland, Holland, Irland, Italien, Kroatien, Lëtland, Lëtzebuerg, Litauen, Malta, Polen, Portugal, Rumänien, Schweden, Slowakei, Slowenien, Spuenien, Tschech Republik, Ungarn an Zypern.

EWR: Island, Liechtenstein an Norwegen

- Wann s du d'Rechnunge bei der zoustänneger Krankekeess zu Lëtzebuerg ageschéckt oder hir se agereecht hues, rechent dës de Präis vun de Rechnunge bei der Keess vum Openthaltsland (mam Formulaire E126 / S067). Du gëss dann no den Tariffer vum Studieland rembourséiert. Op ausdrécklecher Ufro hues du awer hei och d'Méiglechkeet, fir no de lëtzebuergeschen Tariffer an Tauxe rembourséiert ze ginn.

Ier een an ee vun dese Länner studéiere geet, ass et wichteg, ze kontrolléieren, ob déi europäesch Sozialversécherungskkaart nach ëmmer gëlteg ass. Wann néideg, kann een e Certificat als provisoreschen Ersatz vun der Sozialversécherungskkaart bei der zoustänneger Krankekeess ufroen.

Schlussendlech gëtt all net remboursabel Déngschtleeschtung (zum Beispill Orthodontie fir Erwuessener, Osteopathie, Heilpraktiker) aus engem vun de genannte Länner net rembourséiert. Fir vum Remboursement vu bestëmmte Behandlungen wéi Physiotherapie/ Kinesitherapie ze profitéieren, brauch een eng Bescheinigung, déi beseet,

dass d'Krankekeess d'Käschten iwwerhëlt. Dës kriss du bei der CNS.

Krankeversécherung a Groussbritannien:

Duerch den Austrëtt vu Groussbritannien aus der Europäescher Unioun wäerten och Ännerunge bei der Krankeversécherung entstoen. Hei gëllen ab dem 1. Januar 2021 déi Bestëmmungen, déi am Austrëttssofkommes festgehal goufen.

Den Detail heizou fënns du ënner:

cns.public.lu/de/assure/droits-demarches/protection-sociale-etranger/etudier-a-etranger.html



Fir d'Länner ausserhalb vun der Europäescher Unioun (EU), dem EWR an der Schwäiz, déi duerch eng bilateral Konventioun mat Lëtzebuerg gebonne sinn:

Hei handelt et sech ëm folgend Länner:



Land	Formular
Bosnien an Herzegowina	LU/BiH111
Cap Vert	LCV/5 (5-40)
Nord-mazedonien	Europäesch Sozial-versécherungskaart
Marokko	L/M8
Montenegro	Europäesch Sozial-versécherungskaart
Québec	LUX QUE 4
Serbien	Europäesch Sozial-versécherungskaart
Tunesien	T/L
Tierkei	TR/L-3

Wann s du an engem vun dese Länner studéiers, muss du e Formular bei der Sozialversécherung vun demgem Studieland ofginn, dat bestätegt, dass du d'Recht op medezinesch Déngschtleeschunge während demgem Openthalt hues. Du gëss dann ageschriwwen a fäls ënnert déi selwecht Bedéngunge wéi d'Awunner. Den entspreichende Formular muss op d'mannst 15 Deeg virum Depart an d'Land bestallt ginn.

Du kanns deng Rechnungen direkt op der Plaz bei der zoustänneger Institutioun ofginn, déi dann déi medezinesch Käschten no den Tauxen an Tariffer, déi do gëllen, bezilt. Du kanns awer och d'Rechnungen an déi zoustänneg lëtzebuergescher Krankekeess aschécken, fir no de lëtzebuergesche Bedéngungen, Tauxen an Tariffer rembourséiert ze ginn.

Mir roden dir, dech bei der zoustänneger Institutioun vum Studieland iwver d'Konditioune vun der Fleg a vum Remboursement ze informéieren.

Déngschtleeschter:innen vum Privatsecteur akzeptéieren d'Formularer, déi hei uewendriwwer opgezielt ginn, net. Hei mussen d'Rechnunge bezuelt ginn an de Remboursement ka just bei der zoustänneger lëtzebuergescher Krankekeess ugefrot ginn.

Fir d'Länner ausserhalb vun der Europäescher Unioun (EU), der EWG an der Schwäiz, déi NET duerch eng bilateral Konventioun mat Lëtzebuerg gebonne sinn:

Et handelt sech hei ëm all aner Länner op der Welt, ausserhalb vun der EU, der EWG an der Schwäiz, déi net mat Lëtzebuerg duerch eng Konventioun verbonne sinn, sou wéi d'USA oder Australien.

D'Rechnungen aus dese Länner mussen un déi zoustänneg lëtzebuergesch Krankekeess geschéckt ginn a ginn dann no de lëtzebuergeschen Tauxen an Tariffer rembourséiert, ënner der Bedéngung, dass des Tariffer d'Fraisen decken.

Fir dass d'Rechnunge kënnen rembourséiert ginn, muss se:

- bezuelt sinn,
- detailléiert (a medezineschen an net codéierten Ausdréck) sinn,
- an enger vun de folgende Sproochen ausgestallt sinn: Englesch, Franséisch oder Däitsch.

D'Käschte fir medezinesch Servicer a Spidoldéngschtleschtunge kënnen vum engem Land an dat anert ganz ënnerschiddlech sinn a souguer daitlech méi héich ausfale wéi zu Lëtzebuerg. Et kann also en Ënnerscheid ginn tëscht den tatsächleche Käschten an dem Remboursement vum der CNS - dëst zum Nodeel vum de Versécherter. Wann ee sech an engem vum dëse Länner ophält, ass et dofir vu Virdeel, sech zousätzlech ze versécheren. Natierlech ass et och hei vu Virdeel, sech och op der Plaz selwer bei de Sozialversécherungsorganisatiounen iwwer de Fonctionnement vum Gesondheetsystem oder d'Flegekäschten ze informéieren.

Weider Informatiounen fënnt du ënnert folgendem Link:

cns.public.lu/de/assure/droits-demarches/protection-sociale-etranger/etudier-a-etranger.html

acel.lu/2023/11/23/studeieren-am-ausland-oder-zu-letzebuerg-wei-verleeft-dprise-en-charge-vun-de-gesondheetskassen/



CNS



CSL Broschür

Folgend Informatiounen bezieen sech op eng Affiliatioun bei der CMCM:

Déi gréisst Mutuelle zu Lëtzebuerg, déi keng Assurancégesellschaft per se ass, ass d'Caisse Médico-Complémentaire Mutualiste (CMCM). D'CMCM gëllt als Zousatz zu der gesetzlech virgeschriwener Krankenversécherung an trëtt bei wichtege medezineschen Agrëffer, Zännokter a bei Openthalter am Spi-

dol zu Lëtzebuerg souwéi am Ausland a Kraaft.

D'CMCM-Assistance ass gratis am Basispackage mat dran a bitt e Service am Fall vum enger Erkrankung oder engem Accident am Ausland. Bei engem Spidolsopenthalt iwwert eis Grenzen eraus ass ee bis zu 100.000 € weltwäit ofgesécher. De Rapatriement op Lëtzebuerg souwéi d'Birgungskäschten sinn illimitéiert mat abegraff. Souguer eng Reesrécktrëttsversécherung ass mat dran.

Wann een d'Garantie PRESTAPLUS ofgeschlossen huet, iwwerhëlt d'CMCM d'éischt Klass Zëmmer souwéi de Supplement vum dem:der Dokter:esch a präventiv Medezin. Zousätzlech gëtt och nach d'Garantie DENTA- an OPTIPLUS ugebueden. Dës iwwerhëlt een Deel vum de Käschte vum dem:der Zännokter:esch, vum Zännimplantater an Zahnsparagen, souwéi och bei Brëller, Kontaktlënsen an der Chirurgie Réfractive.

Student:innen, déi wärend hirem Schouljoer am Ausland ambulant mussen behandelt ginn, kënnen der CMCM fir ee Remboursement eng Kopie vum der bezuelter Rechnung mat der d'Ofrechnung vum der Gesondheetskeess eraschécken. Fir dem:der Student:in onnéideg administrativ Demarchen ze erspueren, kann dëst och ganz bequiem an direkt via d'CMCM-App eragereecht ginn. D'Bedelegung un de Fraisen, déi de:d' Student:in doduerch huet missen droen, gi vum der CMCM iwwerholl. All Jobstarter:in, deen iwwert sengen Elteren affiliéiert war a sech elo selwer bei der CMCM umellt, kritt dat lafend Joer an dat Joer drop vum der CMCM geschenkt.

A photograph of a man and a woman in a professional setting. The man, with short brown hair and a beard, is leaning over a laptop, looking at the screen with a focused expression. The woman, with long blonde hair, is smiling broadly and looking at the same screen. They are both wearing business attire. The background is softly blurred, showing what appears to be an office environment with plants and other people.

STAGEN

WAT MUSS ECH WËSSEN WANN ECH EE STAGE ZU LËTZEBOURG MAACHEN?

STAGEN ZU LËTZEBOURG

Den 21. Mee 2020 gouf d'Stagëgesetz gestëmmt. Doduerch, datt d'Chamber dëst Gesetz ugeholl huet, huet se de Stagen zu Lëtzebuerg endlech eng legal Basis ginn. Dëst Gesetz reegelt ënnert wat fir enge Konditioune Stagen zu Lëtzebuerg kënnen gemaach ginn. Am Kader vum dem neien Héichschulgesetz 2023 koum et dunn zu enger éischer Upassung.

Ënnerscheet gëtt dobäi tëschent zwou Kategorien, nämlech de konventionéierte Stagen (Stages conventionnés), déi een am Kader vu senger Formatioun muss maachen, an de praktesche Stagen (Stages pratiques), déi ee fräiwëlleg mécht.

STAGËKONVENTIOUN

Eng weider Neierung ass d'Afféiere vun enger Stagëkonventioun (Convention de stage). Dëst Dokument ass obligatoresch fir Stagen, déi zu Lëtzebuerg gemaach ginn. Bei de Stagen, déi am Kader vun enger Formatioun gemaach ginn (Stages conventionnés), muss dëst Dokument vum Stagiaire sengem Patron a vun der Uni/Héichschul ënnerschrifwe ginn. Fir praktesch Stagë muss natierlech just dem Patron an dem Stagiaire hir Ënnerschrëft op dësem Dokument stoen. Déi genau Informatiounen, déi an dëser Konventioun mussen drastoen, an eng Beispill Konventioun fir praktesch Stagen, zur Verfügun gestallt vun der Chambre de Salariérs, fënns du op www.acel.lu/stagesgesetz



BEZUELUNG

Hei gëtt zwëschen obligatoreschen a fakultative (praktesche) Stagë ennerscheid.

Obligatoresch Stagë vun der Universitéit oder Héichschoul mussen ab enger Dauer vu 4 Woche mat 30% vum Mindestloun remuneréiert ginn.

Praktesch Stagen ab enger Dauer vu 4 Woche bis 3 Méint gi mat 40% vum Mindestloun bezuelt

Praktesch Stagë mat méi wéi 3 Méint gi mat 75% vum Mindestloun bezuelt.

Praktesch Stagen dierfe maximal eng Dauer vu 6 Méint beim nämmelechte Patron hunn.

Zousätzlech gi Stage, déi innerhalb vun engem akademesche Joer beim selwechte Patron stattfannen, esou bezuelt wéi wann se ee ganz wieren. Dat heescht konkret, dass wann een en zweete Stage mëscht, ee réckwierkend muss fir den éischten entlount ginn.

D'Indemnisioun, bezitt sech op de Mindestloun (S.S.M) deen zum Moment vum Stage festgeluecht ass. Wann ee nom erfollegräichen Ofschloss vun engem éischten Zyklus vun enger Héichschoul, en praktesche Stage mécht, gëtt als Referenz de Qualifizéierte Mindestloun geholl.

STAGEN TËSCHT DEM 1. AN 2. ZYKLUS:

Zwee wichteg Punkte gëllt et dann och nach ze ernimmen. Stagen tëscht dem Bachelor (Zyklus 1) a Master (Zyklus 2) si weiderhi méiglech. Allerdéngs ass et esou, datt heifir just ee Joer virgesinn ass. Ab dem Zäitpunkt vum Bachelordiplom huet een also ee

Joer laang d'Méiglechkeet Stagen ze maachen. Allerdéngs däerf een net méi, wéi sechs Méint Stage am Ganze maachen. Dëst gëllt och, wann een e Stage nom Ofschloss am Lycée wëll maachen eier een op der Universitéit/Héichschoul ufänkt.

Wann ee säi Masterdiplom bis an der Täsch huet, däerf een zu Lëtzebuerg kee Stage méi maachen, ausser, wann een an engem Bachelor- oder Masterstudium ageschriwwen ass a während senger Studien e Stage maache muss.

WEIDER INFORMATIUNEN

Verschiede Stagë falen net ënnert dëst Gesetz, well dës Stagë schon an anere Gesetzestexter gereegelt sinn. Dobäi handelt et sech ëm obligatoresch Stagen am Kader vun der Formation professionnelle, Orientéierungsstagen a déi een am Lycée maache muss (Schnupperstagen).

Méi genau Informatiounen zum Stagëgesetz fënns du op

www.acel.lu/stagegesetz



Op der sich no enger

AARBECHT

oder engem

STAGE?



Job Portal

...





» Weider Informatiounen:

Hues du net dat fonnt wat s du gesicht hues?

Kee Problem! Schreif eis einfach eng Mail a mir kucken dir sou séier wéi méiglech op deng Fro ze äntweren oder dech un déi richteg Persoun weider ze leeden.

www.acel.lu // contact@acel.lu //  ACEL-De Studentevertrieder

 ACEL-De Studentevertrieder //  @acelluxembourg //  acelluxembourg

Seuls les textes légaux font foi (Mémorial A, Code du Travail).

Les informations contenues dans la présente publication ne préjudicient en aucun cas à une interprétation et application des textes légaux par les administrations étatiques ou les juridictions compétentes.

Le plus grand soin a été apporté à la rédaction de cette brochure. L'éditeur ou l'auteur ne peuvent être tenus responsables d'éventuelles omissions ou erreurs dans le présent ouvrage ou de toute conséquence découlant de l'utilisation des informations contenues dans la présente publication.

The bridge to your freedom

SPUERKEESS.LU/axxess



Ta carte
Ton compte
Tes avantages

STUDY

Pour les étudiants de 18 à 30 ans

Banque et Caisse d'Épargne de l'Etat, Luxembourg, établissement public autonome 1, Place de Metz, L-1930 Luxembourg, R.C.S. Luxembourg B30775

